


Mwan



Teris Dogley
Florans

Mwan Florans

**par
Jeris Dogley**

Lenstiti Kreol Lans-O-Pen

© 1994 Lenstiti Kreol

Mwan Florans

“En fiy apenn adolesan ti pe viv avek son manman ek son papa dan en latmosfer sekirite. En zour son papa ti kit lakaz. En pe letan apre son manman ti anmenn en lot zonm dan lakaz. Deswit en sikodranm i konmanse pour sa pti fiy ki ti konmans ganny abize seksyelman par son boper. I plonz dan en tromatism total letan son manman pa krwar ki son fiy I dir li. En roman ki fer ou dekouver serten laspe sosyal e domestik en fanmiy dan serten konteks aktyel Seselwa.”

Mwan Florans

SAPIT 1

Tou zanafan, zennfiy konman zennzan, zot kontan e vreman dan lazwa kan zot annan en papa kot lakour. En papa ki zot partaz lafeksyon avek, en papa ki zot partaz lanmour avek, me dan son vre sans, en papa ki pran konsiderasyon pour zot.

Oubyen bann ki annan boper, mon asire ki zot osi zot kontan li. Mon asire ki zot boper i pran zot konman son piti. Mon asire ki zot boper i annan en konsyans, e ki prensipalman zot bann zennfiy, zot pa pou ganny lanvi degout zot boper parey mwan.

Mon rapel ler mon ti annan mon papa kot lakour, Mwan Florans lazwa mon ti annan bokou. Mon ti pe ganny en vre lafeksyon, en vre lanmour ek en vre responsabilite ... En papa ki mon lanbisyon depi lontan se viv avek li pour lavi, aköz mon ti vreman annan sa vre lanmour pour li.

Mon papa ti en zonm lapo en pe kler. I ti sov e ti mon plezir par ler pour pas lanmen dan son latet, me pa papa ki ti pou ankoler aköz i ti konnen ki sa ti en fason pour mwan montre ki mon kontan li.

Zot ti marye zot de manman kan mon ti annan selman de an.

Papa ti travay konman debarder Nouvo Por e son lapey pa ti tro satisfè lakour. Me i ti annan ankore metye par kote ki i ti fè, parey sarpantye e larzan ki i ti gannye, i ti azout avek son lapey debarder pour ed lakour. Me menm sa, nou ti vreman ere. Larzan pa touzour fè en fanmiy ere. Me lakonpreansyon, linite ant manm sa fanmiy, sa i annan plis valè ki larzan. Me malerezman sa bann bon kalite ki en fanmiy i bezwen pa ti mars pour lontan se nou e lafot sete manman.

Manman pa ti senser. I ti ape galan par deryer avek Misel. Kan li papa ti tann sa bann premye nouvel, Manman li, i ti ganny pour li demanti tou. Me bann vwazen obor nou i annan ase lizye.

Serten ti kontinyen koz par deryer lo sa sityasyon, me bann ki ti pli byen avek nou, ti pens papa sa ki ti pe arive.

Lizour ler mon ti'n al lekol e papa ti'n al travay, Misel ti mont kot manman tou le zour. Ler i ti konnen ki lekol pe large, i ti desann pour mwan pa vin zwenn li avek manman dan lakaz. Me zot pa ti konnen ki ti annan vwazen ki ti pe remark tou zot grimas.

Akoz sa, en gran labriz ti leve ant mon papa ek mon manman e zot separasyon ti arive. Papa ti kit lakaz avek nou, menm si i ti'n travay vreman dir pour nobou gannnen. Mon konnen osi ki i pa ti son leker ditou pour kit mwan deryer, me kekfw sa ti son sel solisyon. I pa ti kapab fer otreman. De trwa zour apre, mon ti aprann ki i'n al lo zil Daros e ziska ozordi, mon pa ankor war sa vre papa ankor ditou.

Misel a son tour ti vin reste kot nou zis de trwa semenn apre kitans mon paran. Sa letan i pa ti travay, me i ti okouran ki prezan i annan en fanm pour sonnyen e alors i ti al rod deswit en plas travay kot Seybrew.

Misel i en zonm 45 an avek gran seve nwar, lapo en pe fonsé. Lo son fron toultan i annan lanmin, e byen rar i annan sourir lo son figir.

Depi zour ki i'n vin reste kot nou, mon'n toultan remark li pe get mwan. Par ler i'n menm kriy mwan e ler mon'n apros li, zis i'n get mwan e sakouy latet, me en mo i pa'n dir mwan.

Apre ki i ti'n fer sa pour de trwa fwa, mon ti apros li personnelman en zour e mon ti demann li ki i annan pour dir mwan ki i ezite dir. Me i ti dir mwan ki pli tar mon ava konnen. La ozordi ki mon'n ganny 12 an, i sa bann zour ki mon konnen aköz. Ti en zour Sanmdi, apepre de mwan pase ler i ti konmans sa ki ti pou arive pour premye fwa. Manman t'in al anvil e nou ti selman nou de kot lakour. Mon ti ape netway mon lasanm e li i ti ape zwe lanmizik dan salon.

En pti moman mon ti tann lanmizik tennnen e mon ti tann son lavwa pe kriy mwan. Mon ti sorti dan lasanm e vin kot li. Me sa letan i ti'n sorti dan salon e ti'n antre dan son lasanm.

Mon ti demann li pour kwa i'n kriy mwan, me i ti dir mwan antre dan lasanm i a dir mwan.

Mon ti ezite. I ti remark mon lezitasyon deswit e i ti vin obor mwan limenm. I ti debout la pour apepre en minit san dir naryen. I ti zis get mwan fran dan mon lizye, ti apre ler mon ti ape al vire pour ale ki i ti redi mwan dan son lasanm e ferm laport par deryer nou.

En fwa anndan, mon boper ti ser mwan lo son lestoma. Mon pa ti ni kapab bouze. La, pour premye fwa, i ti fer son demann. Mon pa ti kapab dir li ni wi, ni non. Mon ti'n vreman soke kar mon pa ti ape mazin en keksoz parey. Me i pa ti donn mwan letan pour fer okenn desizyon. Ki swa mon ti dakor ou non, i ti trenn mwan lo lili e la mon ti bezwen fer parey ti son dezir.

I pa ti realize si ti mon boper e plis ki sa si mon ti ankor selman en zanfán 12 an.

Aswar ler manman ti retournen, mon pa ti kapab dir li sa. Mon ti manz anndan an krwayan pa pou ariv ankor. Me saler mon pa ti konnen ki prezan lavi pour mwan pou nepli parey. Dan lekol depi lontan, mon'n toultan travay byen. Mon'n toultan anmenn en bon rapor kot lakour. Manman, byensir, i'n fyer avek mwan. I'n ankouraz mwan pour kontinyen lo sa nivo e si posib mont pli o.

"Ou lavenir i devan ou, i dan ou lanmen. Son bann fri i depan lo ou zefor ki ou devret fer konmela menm." Sa i son bann pli bon parol lankourazman ki mon'n toultan kit dan mon latet e reflesir lo la.

Me depi sa dernyen tan, mon nivo akademik pe konmans desann. Dan laklas mon konmans reve. Mon konmans ariv dan lakour dan rev. Mon konmans war mwan lo lili avek mon boper. Par ler profeser i kriy avek mwan. Mon sote e revin dan laklas ankor, me de trwa minit apre, mon ariv ankor lo lili avek Misel.

Dan aswar par ler, ler mon pe fer mon devwar, Misel i kontan vin asiz obor mwan e anbet manman an dizan i pe montre mwan leson. Me kan saler, nek i pe pas lanmen lo mwan. Nek i pe detas mon lenz. Mon anv kriy manman e dir li, me mon pa oule okenn labriz leve e alors mon kontinyen reste trankil menm si mon pe konmans ganny afekte.

Ler i pe fer tousala, mon perdi konsantrasyon dan leson e mon bezwen ferm kaye e fou laba. Mon bezwen fer krwar mon al dormi pour li nobou donn mwan en lape. La lannmen kot lekol, mon pou bezwen demann mon bann kanmarad pret kaye pour mwan kopye.

“Florans, ki ou fer konmela dan aswar kot ou ki ou pa ganny letan pour fer ou leson?” Sanmenm ki zot pou demann mwan. Me mon toultan fer zis bann pti sourir lakanmizri avek zot san reponn zot kestyon.

Napa en mis sepandan ki mon kapab rakont mon problemm avek, ni menm Mis Lidya ki fer mwan leson lo lavi familyal. Si en problemm mon pa oule dir mon prop manman menm si i premye dimoun ki ti merit konn sa avan, lekel ki mon pou fye dir?

Papa osi toultan in ankouraz mwan pour etidye byen. Me sa dernyen tan mannyer mon’n degrade, ki i pou kapab dir mwan? Ki i pou panse si mon arive zwenn li? Petet i a konnen ki mon dan problemm. Petet i a konpran ki depi son depar tou keksoz pour mwan pe sanze.

I mank de semenn pour sa premye trimes lekol fini. Semenn prosenn pou annan legzanmen, byen sir. Legzanmen ki pou prouve kwa ki nou’n retenir dan nou latet pandan sa trimes e si nou pe fer progres.

“Florans, in ler pour konmans etidye ou leson. Legzanmen pe konmanse semenn prosenn, non? Sa ti parol manman yer swar zis konman nou ti’n fini dinen. Me mon ti annan keksoz pour reponn li.

“Byensir legzanmen pe vini manman, e mon dakor etidye leson. Me ler i annan pinez pe pik mwan, mon agase e perdi konsantrasyon.” Zis konman mon ti’n fini dir sa, mon ti realize mon’n fer en fot. Mon boper ti pe get mwan avek en lekspresyon enkyetan lo son figir. Si mon ti kontinyen, tou keksoz ti pou sorti

deor. Manman ti demann mwan deswit lekel sa pinez. Granmersi mon ti konnen ki pou reponn.

“Non, manman, mon’n fer en fot. I pa pinez ki mon oule dir, me moustik. Kontrer in ler pour konmans fer mannyer pour trouv en lafen avek sa bann moustik. Taler zot ava anmenn maladi isi.” Manman ti riye. Vre dan lakour i annan en pe moustik. Me i pa ti konnen ki sa moustik mon oule dir i senpleman son mari, Misel.

Sa semenn i pas vit, sitan vit ki en pe mon bann plan mon pa ganny letan fer. Mon bezwen vol letan dan laklas pandan ki lezot leson pe deroule pour mwan etidye mon bann leson. I annan zis enn sepandan ki antre en pe fasilman dan mon latet. Sa i zeografi. Larestan pa oule antre ditou. Aswar dan lakour konman mon fini dinen, mon bezwen tonm lo mon plas deswit. Kantmenm mon anv reviz leson, mon konnen poudir mon boper pou vin fatig mwan. Alors mon prefere vol letan dan laklas menm pour fer sa. Me sa voyaz, mwan Florans mon’n fini trouve ki mon pa pou reisi. Mon konnen mon bann lezot zanmi ki mon abitye sorti avan zot dan legzanmen sa voyaz zot pou fer mwan kanmi, menm si zot pa konnen. Mon konnen ki zot pe panse ki mon pou tonm premye ankor. Me si zot konn mon problemm, si zot konn mon sityasyon, zanmen zot pou ganny lanvi ganny en doutans parey. Me, mon a esey fer mon mye menm si mon konnen i pa pou tro marse.

Legzanmen i arive e nou konmans avek Angle. Mon ekrir mon non avan lo papye parey i mon labitid e mon feyte apre pour observ bann kestyon.

Mon get osi mon bann kanmarad dan laklas kot pe degaze pour fer sa Angle. Letan i pas vit e taler ou a tann profeser dir met bolpenn ater e aret ekrir. Mwan Florans, i premye fwa ki papye i get mwan e mwan osi mon get li. Mon sey reponn selman bann kestyon senp ki menm en marmay dan premye pou kapab reponn. Larestan, laplipar ki pli difil zis zot riy avek mwan e mon konnen sa riye zot pe dir mwan ki sa voyaz mon pa pou reponn zot.

Mon la, en kote lanmen mon tyonbo bolpenn e met dan mon labous. Lot kote lanmen, mon met anba mon lanmaswar. Menm moman, osi mon ganny pour mwan mazin mon boper. Mon ganny pour mwan reve ki mon lo lili avek li. La mon reste zis dan lakour.

Mon boper pe anbras mwan. Mon pe sey rekil mon labous avek sa ki pour li. Me i kontinyen anmenn son labous kot pour mwan. Mon mord li e i kriy ayoyo e i larg mwan deswit. Menm moman mon sote e mon mazin ki mon dan laklas pe fer legzanmen. En pti moman apre osi, profeser i dir, "Met tou bolpenn ater e aret ekrir. Ler in arive."

I pase i anmas papye. Mon santi de gro larm ki konmans koule lo mon lazou. Anmas papye kan mon'n reponn selman 5 kestyon fasil ki pou donn mwan an tou selman 10 pwen. Mon la, mon bes mon latet lo latab e larm i devide. Parmi mon bann kanmarad, i annan ki konmans dir papye ti fasil. I annan ki dir i met li dan 90, i annan 80. Mon kontinyen plere me person pa remarke.

Sakenn i sorti pour rekreasyon, me selman mwan mon prefere reste dan laklas. En nide i pas avek mwan osi. En nide ki pe dir mwan leve e fer en lapriyer an demandan lagras ek lape pour mon lespri pandan sa bann lezot legzanmen ki pou swiv. Mon pa les sa nide al kounmsanmenm. Mon lev mon latet e mon konmanse, "O non di Per e di Fis e di Sen-t-Espri, Amenn. Mon Dye, ou ki kapab fer tou. Ou ki war tou e se ou ki kapab rod solisyon dan tou keksoz.

Mon Dye ou ki mon sel papa ki mon annan konmela, fer ki mwan, Florans, mon a fer mon bann lezot legzanmen ki pe vini byen. Anvoy ou Lespri-Sen dan mwan pour ekler mon lespri pour konsantre dan leson. Mon Dye fer ki mon pa mazin ditou mon boper. Mon Dye, mon papa, mon sipliy ou e espere. Amenn."

Apre sa lapriyer, mon leve. Mon pran mon mouswar dan mon pos rob e mon eswiw mon lizye. Konman mon pe ale pour sorti deor, mon mis Angle i kriy mwan.

"Florans, kimannyer ou'n war papye Angle? Mon espere ki ou'n fer byen parey labitid, non?"

"Mis, sa ki mon'n donn ou, ou pou bezwen rann mwan parey."

Mon vire pour al dan kabinen, me i kriy mwan par deryer. Mon pa ni vire pour get li. Mon pa oze get li fas a fas.

Bann lezot legzanmen i arive. Mon war drol. Drol aköz mon pa war okenn amelyorasyon. Bondye pa'n egzos mon lapriyer. Okontrer sityasyon i vin pli pir. Tou larestan papye mon mal fer menm.

Ar wi! ki mon ekspekte mon manman Titin dir mwan ler i pou war mon rapor? Mon konnen i pou ankoler avek mwan. I pa pou konnen ki lafot mon degradasyon se li. I pa pou konnen ki si i ti senser anver papa, si i pa ti al rod en lot, pour al galan par deryer avek sa loulou, mon degradasyon lekol e sa separasyon pa ti pou arive. I pa ti pou ganny li en zonm ki napa konsyans en boper. En boper ki pe bar mon lavenir. En boper ki pe konmans fer mwan vyeyir avan ler avek problemm. Eski sa i en pinisyon ki Bondye i oule donn manman? Eski mwan osi mon koupab dan sa ki'n arive?

Mwan Florans, mon pa konn ditou ki mon pou fer. Mon pe konmans ganny lanvi pour sove kot lakour. Me sov kot lakour, kot mon pou ale? Eski i annan mon bann fanmiy ki pou oule anmas mwan kan zot tou zot in ay manman pour sa ki i'n fer? E mwan osi mon pe ganny met dan menm sak avek li, konmsi mon menm konplis.

Mon boper, en zonm 45 an, e mwan, mon annan selman 12 an. Eski i napa regre lo son leker pour fer sa? Eski i pa war ki mon ankor vreman feb? Mwan ki zis parey en fler ki'n fek ouver. Mon pti tete fek konmans pouse. Bann sanzman fek konmans arive dan mon lekor e mon ankor vreman lwen, lwen pour kapab dir ki mon en adilt. Mon fek konmans antre dan mon peryod adolesans e mon pa anvi ki sa bann problemm i kontinyen. Me ki mon pou fer pour ganny en solisyon? Eski mon devret dir mon manman Titin? Si wi, kimannyer mon pou konmanse? Pa pou annan dispit ek lager antre zot? Manman pa travay, nou pe viv dan lanmen Misel. Si zot separe, kot nou pou ganny nou lavi? Lekel ki pou sonny

nou? Non, mon pa krwar si mon devret dir manman pour lemoman. Mon a kontinyen tenir ziska ler mon pa ava kapab tenir e alor mon a dir tou sa ki lo mon leker e tanpi sa ki pou arive ...

Ozordi mon leve e soley in konmans aparet lo lorizon. Sa soley ki'n lev boner, i fer mwan remarke ki ozordi pou annan en zoli letan. En letan byen ge ki pou met lazwa dan leker tou bann zanfann akòz ozordi i vakans. Me menm si i vakans, pour mwan i napa okenn lazwa parey mon abitye annan letan vakans i arive. Mon'n annan lazwa dan bann dernyen vakans avan akòz mon ti konnen ki mon ti ape al ganny en rapor ekselan ki pa ti pou fer zis mwan kontan, me mon bann mis e osi manman. Ozordi sa rapor, ni atrap en segonn dan mon lanmen mon pa pou anvi atrape. Ni pou montre manman.

Toudmenm yer swar lo lili mon'n fer en nide. Konman mon pou ganny sa rapor, mon pou desire. Apre mon pou anbet manman. Mon pou dir li ki nou pa'n gannye ozordi, me nou'n ganny demande pour vin serse dan vakans. La mon pou pran enn mon bann vye rapor. Mon pou aranz dat lo la e donn manman. Sa i a bezwen marse.

Kot lekòl, tapaz i bokou parey labitid. Lo tou figir i annan vre lazwa. Mwan, mon al asize mwan tousel dan en kwen ziska ler laklos i sonnen.

La mon antre dan sa laklas ki ranpli avek tapaz. Pa tarde, zis en pti moman apre, Mis Mari ki nou ansennyan laklas i antre avek nou rapor. I demann en silans konplet e dan en pti moman, okenn mous vole ou pa tande. La i distribye nou rapor. Tapaz i konmans ankòr. Marime i kriye ki in sorti premye. Mis Mari i dir li ferm labous. Par sa parol mon remarke ki i ankòl ozordi.

I fini donn sak marmay zot rapor me i gard pour mwan dan son lanmen. Mon war li ouver, i gete, apre i sakouy latet. I fer mwan sinny pour vin kot li e mon lev deswit mon apros li. I ouver mon rapor devan mwan. Mon get selman pour apepre en minit. Apre nek mon lizye i noye

dan larm. Angle 10 pousan, Franse 20, Matematik 18. I ase pour mwan gete. Mon fini konnen kimannyer larestan i ete.

Mon pa les li donn mwan mon rapor limenm. Mon aras li dan son lanmen e mon sot deor. Mon tann en tapaz par deryer mwan, me mon pa ni vire. Mon sot lo semen an tayan e mon monte.

Me mon pa anvi antre dan lakour sa ler. Alors ler mon ariv en bon bout semen, mon koup dan lapay e mon maske. Taler ler mon a tann mon bann kanmarad pe fer tapaz kot zot pe monte, mon a sot lo semen mwan osi e mon a mont dan lakour.

La prezan ki mon get byen sa rapor dan mon lanmen. Napa en leson ki mon'n ganny A. Mon pli o pwen i Zeografi ki mon'n ganny 42, e menm pli fermal ankòr, mon'n sorti dernyen.

Sa pa en rapor pour mwan montre manman e alors par pti bout pti bout mon desir li.

Marmay pa tarde monte osi. Parey tou le vakans, lekòl i larg midi. Ler mon war premye dimoun monte, mon sot lo semen mwan osi e mon mont dan lakour.

Me mon pe mazine ki'n kapab pase kot lekòl ler mon'n aras mis mon rapor. I'n bezwen al dir direkter. Si vre i'n fer sa, mon pou bezwen ganny apele kot lekòl pandan vakans.

Me i pa letan pour mwan mazin tousala. Mon lespri i ase fatigue. Mon a repoz li en pe, olye pour mwan konmans mazin kot lekòl.

SAPIT 2

Mon en pe kontan ki sa voyaz manman pa'n demann mwan ditou mon rapor. Kantmenm vakans in vini, konmsi i'n obliye si mon'n devret gannyen. Saler mon'n fini prepar enn vye pour donn li si i ti demann mwan. Me petet plitar i a mazine e alors mon ava kontinyen anmas sa enn.

Lekol osi pa ankor kriy mwan pour diskite lo sa lensidan zour vakans. En ler mon oule krwar ki petet mis Mari pa'n al pli devan avek sa. Mon pa rapel ofans li e zanmen mon'n deza fer en keksoz vreman mal ki direkter in apel mwan dan son biro pour remontrons mwan. Sa i premye fwa ki mon'n fer en fot. Petet i'n pran konsiderasyon pour mwan. Selman i kapab osi ki i doute ki i annan serten problemm avek mwan pour le moman. I annan posibilite ki i a esper larantre pour demann mwan leksplikasyon lo sa size.

Mis Mari i konn manman osi tre byen. Lontan ler manman ti ankor avek papa souvan i ti dan lakour. Annefe, i kouzin papa. Depi separasyon mon paran, i pa ankor pas isi kot lakour, me kot i zwenn manman zot koze. Zot ankor vreman byen e i le sel fanmiy papa ki ankor byen avek manman.

Mis Mari i en dimoun en pe parey manman. Li, i pa ankor kite avek son mari marye, me i pe fer parey manman ti fer avek papa. Son mari i konn tre byen ki i pe fer sa, me i pa en zonm parey papa pour pran lakoler vitman. Pli i konnen ki mis Mari pe fer sa, pli i dir ou ki i kontan son madanm en kantite. Papa kekfwapa ti oule ki son manze i partaz an de, me li pov pti bet, pour li pa en problemm. Mis Mari, pour en dimoun ki pe montre lekol i ti devret pe donn legzanp e pa fer sa bann simagri ki i pe fer.

Si ou pou met li avek manman dan menm sak, zot pou vreman ale ansanm.

Salerla, manman i annan en vant wit mwan avek li. Tre byento i pou al met son dezyenm piti lo later. En piti ki ava annan menm manman me pa menm papa ki mwan. Menm sa mon pe zis priye pour li fer en fiy

pour mwan war si Misel pou fer parey avek son prop fiy parey i pe fer avek mwan. Me pour sa mon pou bezwen esper pour apeare 13 an. Sa fiy pou bezwen grandi e ariv mon laz avan ki i a kapab fer sa si vreman i pou fer.

I kapab sa letan ki mon'n kit sa lakour e ganny en msye. En msye? Non, mon pa krwar si mon pou ganny enn, sirtou enn ki apeare dan mon laz. Petet mon ava'n fini mor sa letan, me ganny en msye mon pa tro asire.

Partou kot mon pase mon pa war en garson ki enterese avek mwan. Kot lekol menm, laplipar mon bann zanmi fiy zot annan pour zot. Dan aswar ou war zot deryer lekol pe anbrase. I annan ki menm al koz deryer legliz. I annan zot bouldou i kondir zot ziska pros kot lakour. En bann osi tou le zour pe ekri pti let. Me mwan person pa ankor deza apros mwan pour dir mwan naryen. Petet si mon ti annan enn, i ti ava en fason pour mwan fer mon boper konnen ki mon pa enterese avek li. Par sa, mon ti a fer li konnen ki manman ki pour li e mwan, mon annan pour mwan. Me tou sa bann sans pa ankor arive pour mwan e petet ler zot ava arive, i a'n tro tar.

Pa zis garson dan mon lekol ki paret pa enterese avek mwan, me bann osi ki mon rankontre partou partou. Zis selman bann vye grannwar sou parler ki soufle avek mwan ler mon pas obor zot. Bann dan mon laz kantmenm zot sou person pa soufle avek mwan ni pou kriy mwan. Enn ler mon oule krwar ki petet mon'n ne selman pour bann grannwar 40 an, 50 an e menm 60 an anmontan, non pa pour bann ki menm laz ki mwan.

"Me profite manman, fer en fiy ki petet i ava dan mon benefis ..."

Mon santi ki mon ti devret annan en ser oubyen en frer depi lontan menm. Tou sa letan mon'n viv mwan tousel e mon pa'n konnen kisisa en ser oubyen en frer. Si papa ti ankor la, mon ti a'n bezwen ganny frer ek ser depi lontan menm. Nou ti ava pe zwe ansanm, fer pronnad dan lafore, pran ben-d-mer dan Dimans, desann tou le zour pe al lekol ansanm. Nou ti ava vreman ere. Ankor tousala pa'n arive aköz pitennri manman.

Sa enn ki i pe al met dan lemond byensir mon pou kontan li. Me i pa pou menm kontan parey si i ti menm papa avek mwan. Mon ti a konnen i

ti a vin swa mon frer oubyen ser an antye me pa pou menm manman e pa menm papa parey mwan i pa arive. Me lavi i koumsa, alors mon bezwen aksepté li parey.

Misel i sorti travay e i'n vin zwenn zis mwan dan lakour. Manman bomaten ti'n al klinik me i'n retournen plitar dan lanbilans. Konman i ti debarke i ti donn mwan en nouvel.

"Florans mon pe ale. Ler in arive pour mwan al met sa pake ater. Fer Misel konnen tanto ler i retournen sorti travay. I ti vreman prese. I ti al pran son valiz anndan e i ti anbras mwan e foulkan. Mon pa konnen pour konbyen lannen i pa ankor anbras mwan me bomaten mon pa konnen si i ti'n reve."

Misel in vini parey son labitid avek de trwa sopin labyer. I'n asize dan salon pe bwar. Mon pa tarde. Mon al dir li konmisyon manman.

"Ton Misel, manman pa'n telefon ou."

"Non, okontrer oli li?"

"Depi bomaten i'n al maternite."

"Mon konpran. I'n al met son pake ater. La i'n tro tar pour mwan al get li. Demen an sortan travay, mon ava pas an pasan mon al war li."

Apré sa, zis i get mwan e son labous i ouver fermen konmsi i annan keksoz pour li azoute. Mon pa kapab tarde kot li. Mon ti'n met mon kastrol bouyon lo dife e mon bezwen al gete.

Ler mon sorti kot li, lafreier i konmans antre avek mwan. Mon konmans ganny frison dan mon lekor antye e laser poul i leve lo mwan. Pa sanmenm tou, en ta nide pe sirkile dan mon latet parey kouran.

Sa bebet in arive e manman pa pou la pour de trwa zour. Mon konnen i pou devor mwan parey en bebet feros ki bokou letan i pa ankor ganny en pe manze. Lanbeli pour li in donner e mon konnen i pou profite. Me mon'n fer en nide. Kiswa i en pese oubyen non; konmansman tanto mon pou al dormi avek en pti kouto e si i vini mon pa pou pran okenn pitye.

Dan lesyel menm lao zetwal in konmans aparet. Soley in fini dir bonswar later. Letan pe vin pli nwar. Dan pye mang deryer lakaz sousouri pe fer zot festen. Konmela lasezon mang e zot pa bezwen al lwen pour ganny manze. En lannwit antye zot pou fatig dimoun avek zot tapaz e bomaten ler ou leve, deryer lakaz pou'n ranpli avek zot salte.

Mon asize dan mon lasanm mwan tousel e mon ekout zot. Zot pa dan traka parey mwan. Zot, zot vreman zwaye.

Sa bebet pe manze e mwan ler mon kwi manze apre mon pa ganny sa lapeti pour manze. Kantmenm mon'n tir en lasyet, mon'n bezwen forse pour fer 2 pti kwiyer antre e larestan mon'n met laba. Deswit mon'n okip mwan, answit, mon'n pran mon kouto e mon'n antre dan mon lasanm. Sa bebet, mon kit li ankor pe manze.

Apre en lapriyer kot mon remersi Bondye pour sa lazournen ki mon'n pase, mon sot lo mon lili. Sa pti kouto mon met par lao mon latet. Mon ploy mwan piti piti e mon antre anba dra. Sonmey i pase, i anmenn mwan avek li pour en vizit en pe partou.

Anviron 11 er, mon sot en kou e mon sirprann pour war mon boper, sa bebet, obor mwan. I'n may mwan dan mon leren e i'n osi pran en kote mon lanmen e met dan son leren. I'n bezwen vin ler mon'n dan en profon sonmey. Son lizye i gran ouver pe get mwan e i pe fer de trwa pti sourir avek mwan ki mon pa anvi trouve.

Avek laraz mon tir son lanmen lo mon leren e pour mwan osi dan pour li. Mon anvoy mon lanmen pour ganny mon kouto me omenm moman i montre mwan sa kouto dan son lanmen e apre i anvoy ater. Ler i'n vin dormi la, i'n war sa kouto. I'n doute aköz sa kouto i la e alors i'n pran pangar sa kouto i a fer son maler.

Mon lev asize.

"Sorti obor mwan ale.—Pa ou annan ou lasanm avek ou lili laba? Aköz ou pa dormi laba?"

"Florans, ozordi ou koz koumsa ek mwan?"

"Mon koz koumsa aköz ou pe fatig mwan. Ou pe met mwan dan en ta traka. Kisa manman pa ase satisfere ou, e ou bezwen servi mwan osi?"

"Florans, mon pa kontan ou manman. Mon pe zis bat son latet. Me mon kontan ou. Se ou ki mon anvi fer en lavi avek."

"Mwan, mon pa anvi ou, mon pa ni menm anvi kontan ou e konman mon pe ... Mon pa ganny letan fini dir sa ki mon pe al dir li, i tyonbo mwan e pez mwan lo lili. Mon kriye, me i pez mon labous osi. I met mwan touni e apre ..."

Ler ki i'n byen satisfere, i larg mwan e desann ater. Avan i sorti dan mon lasanm, i anmas sa kouto ki i ti'n anvoy ater pli boner. Mon get li kot i ale e pli laraz i marse dan mon lizye. Mon ganny pour mwan ensilte li me i zis riye. Konmsi sa pa naryen pour li. Apre sa, mon pa ganny sonmey ankor e zis mon larm ki reste devide lo lili.

Lizour i fer. Mon leve e mon prepar son gadyak. Mon bezwen fer tou pour li pandan labsans manman.

Mon abitye dan bomaten dir li bonzour, me ozordi ni get li mon pa anvi. Li osi i pas obor mwan latet anba. I zwe kanmi, me saler ki lakanmizri kan i konpran tou sa ki i pe fer.

Apre son gadyak, i pran son kan i ale. Deryer mon pran balye e mon balye lakour. Mon fer prop deor partou, sirtou deryer lakaz kot sousouri in fer zot ta salte mang yer swar.

Apre mon antre e mon netway lakaz. Dan pe met lord dan en tirwar en komod anndan dan lasanm manman, mon war en portre se manman avek papa dan portre zour zot maryaz. Zot in debout lo peron legliz lanmen dan lanmen. Mon get papa e mon de larm i konmans koul ankor. Sa papa i an souriyan e konmsi i pe zis get mwan. Wi, sa en vre zonm, en vre papa, me pa parey sa nespes loulou. Si zis ou ti ankor la mon papa, si ou konnen mannyer mon pe soufer isi deryer depi ou depar. Papa ou depar in anmenn dezespar, problemn, traka e lasoufrans pour mwan. Aköz ki ou ti kite avek manman? Ou ti a'n les li e i ti a reflesir ki i ti pe mal fer e i ti a sanze

petet. Ou'n perdi kouraz tro vit mon papa. Wi, papa fer mwan war ou, si ou annan en lakour dir mwan mon a vin reste kot ou. Mon pa pou kapab kontinyen isi akòz ou pou tande ki en zanfan in fer zanfan avek son boper. Ou pou etonnen ler ou pou tande ki se mwan ki'n fer sa zanfan ek Misel ... Non! Gran lizour mon pe reve. Si mon kontinyen get sa portre rev pou kontinyen pour en zournen antye. Mon remet sa portre dan son plas e kontinyen avek mon louvraz.

En gran apremidi mon asize dan en gran mazinasyon. Mon pe get anba lo sa gran lanmer e i vreman trankil. Zis bann pti tapaz laroul ki mon tande ler zot kraze lo lans. Dan mon lizye; mon pe osi war en gro bato laba e mon kapab war selman en dimoun ladan. Sa dimoun pe fer mwan sinny pour vini. Mon ouver mon lizye pli gran ki mon kapab pour mwan gete lekel sa dimoun. Wi, mon konnen lekel sa dimoun prezan. Me, mon etonnen pour war ki ti papa.

"Papa, papa, esper mwan mon pe vini. Mon kriye. Me son figir i disparet dan bato. Sa bato i al avek en lavites ki zanmen mon'n deza war ankor en bato ale parey. Bato i ale e mon get li ziska ler i perdi lo lorizon."

Non, mwan Florans mon bezwen al rod en lokipasyon pour mwan fer. Si mon asize naryen fer, mon rev tro bokou, e menm kosmar osi pe konmanse. Mon'n kriy papa for e gran mersi ti napa personn obor mwan pour riy mwan. Mon annan en pe lenz dekrase dan zerb mon ava al perse. Mon a ganny en louvraz e mon ava aret reve.

Soley i konmans disparet e letan pe vin pli sonm. Sàk segonn ki pase, sa lazournen i vin pli vye. Marten anmanniman lo brans dibwa pe fer lapriyer. Zot osi zot konpran. Zot konn remersi Bondye apre en bon zournen. Zot menm pli konpran ki sa bebet ki pa konn en mo lapriyer, e zanmen al legliz pour konn kwa ki byen e kwa ki mal.

Ozordi mon'n fini kwi mon dinen byen boner. Ziska prezan Misel pa ankor arive e i ti dir ki i pou pas kot manman ozordi. Me pli i pa vini, pli i bon menm pour mwan. Si ler i vini taler i fer parey i ti fer yer swar, mon pou tanpi ki i kapab arive plitar, me si taler vre i fer parey, demen bomaten

konman i al travay, mwan deryer mon pou al dir manman lopital. Mon'n nepli kapab tenir plis ki sa. Pli mon reste trankil, pli i kontinyen. Yer swar i'n nobou dekouver mon kouto atan, dir granmersi. Sansan vre mon pa ti pou pran pitye. Mon ti pou donn li en mark arete.

Lo revey anndan i dir 7 er e i antre osi. Byen transpire konmsi i'n taye an montan.

"Florans ou manman i dir mwan fer ou salanm. I'n gannyen piti e i'n fer en garson. Pa ou kontan ou'n ganny en frer, non?"

"Wi, mon kontan, me!"

"Me kwa? Konmsi ou pa kontan."

"Non, mon kontan, me les sa dekote. Mon annan en keksoz pour mwan dir ou. Dir mwan, ou napa okenn regre dan ou leker pou fer tousala avek mwan?"

"Florans ou pou difisil konpran. Si ou ti en zonm ou osi, ou ti a trouve ki ler en zonm i lafen, i pa swazir manze."

"Me kantmenm manman i la osi, ou vin avek mwan. Akòz?"

"Larezon mon ti dir ou yer swar. Mon anvi ou, pa ou manman. Mon pe priye kontrer pour ou fini lekol e mon a pran ou nou a fer nou lakour. Titin i a demerd li."

Sa bann parol i fer mwan tranble. Tranble avek lafreyer. Get ki mon al tande ozordi. Ekoute konman nide Misel i ete. Me i fer byen i'n dir mwan. La kot pe arive mon pa pou kapab kasyet ankor naryen. Mon ava esper manman ler i a sorti maternite e mon a bezwen dir li tousala. Mon a bezwen met tou deor avan ki mon tonm dan delo so.

SAPIT 3

Zour i ale en lot zour i vini. Ansanm zot fer lasemenn ki li a son tour i fer le mwan. Manman pa ankore kapab sorti maternite akòz son piti i napa lapeze. Yer mon'n al war li e mon'n sezi pour war groser son piti. Son pti lanmen ek lipye i fen e son figir i fay, ou a dire ki i annan en maladi avek li.

Manman pa paret normal li osi, yer ler mon ti pe koz avek li, mon ti war mwan en pe difisil pour konpran sa ki i ti pe dir mwan. Son lavwa ti en pe anwe e byen dousman. Mon ti demann li kan ki i krwar i kapab sorti, me i pa ti konnen.

Mon ti'n vin ekspreseman osi pour dir li sa ki depi lontan mon pe kasyet, me toultan ki mon ti ouver mon labous, mon ti ferm li deswit. Ti annan en keksoz ki ti ape anpes mwan koze e mon ti gard silans.

Misel a son tour in pran son konze 21 zour avan yer e yer i'n reste kot lakour letan mon ti vin war manman. Ler mon ti retournen, i ti'n fini fer tou louvraz e mon ti napa naryen pour mwan fer. Mon ti asize trankilman, fer letan pase an lizan en liv, me detanzaot i ti kriy mwan e mon ti zwe pa tandé. I ti sey vin obor mwan osi, me toultan ler i ti vini, mon ti leve kot mon ti ete.

“Kisa Florans, ou per mwan ozordi. Pa ou konn byen ki mon annan pour vin dir ou!”

“Si mon konnen, pa neser alors ki ou vin dir mwan. Apre osi, mon pa anvi tann naryen sorti kot ou. Apre sa, i pa ti sey ankore vin obor mwan ni menm kriy mwan. Okontrer i ti al zwe lanmizik.”

La bomaten i son tour pou al war manman. Ti annan en pe lenz pour manman, ki i ti'n donn mwan pour lave. Mon'n dres zot osi e mon'n donn li pour al avek. Depi ler mon lo later, deza 12 an, zanmen mon'n deza debrouye ziska sa degre parey mon pe debrouye konmela. Mon bezwen fer tou.

Tou pti louveraz ki ou konnen i annan kot en lakour pour fer. Granmersi osi, manman in al maternite en letan kot mon pa pe lekol, sansan mon pa konnen ki ti pou kapab arive. Mon bezwen brose, balye lakaz konman balye deor, lave, kwi manze, tousala, mwan menm ki bezwen fer si manman pa la. Li Misel, kantmenm in pran son konze, mon pa konnen kan mon pou ganny li ankor pour fer tou sa louveraz pour mwan parey i ti fer yer. Lapliparditan ler i'n sorti travay, i pa ni okipe si mon pe ganny sofe obor dife. Li konman i vini, i fou son sak laba e antonn son labyer e apre dan lannwit i vin fatig dimoun.

Me sa i mon dernyen semenn vakans, e si manman pa sorti menm, mon pa konnen semenn prosenn kimannyer keksoz pou pase. I a bezwen forse fer louveraz parey i ti fer yer.

Ler i retournen sorti kot manman i vin byen sou. Kot i vini dan semen, nek i drive. Tou semen pour li e i bezwen apiy swa ek ros oubyen ek pye dibwa pour li nobou marse.

Sa degenn ki i ete, i absoliman en koson. Sa semiz blan ki lo li, in sal, tas bwar in kole lo la.

Ler i antre dan lakaz, i vin direk kot mwan dan lakwizin. I konmans son ensinifyan, me mon pous li e bat dan en bann bwat ki dan lakwizin. I lager pour li leve e pour premye fwa i ensilte mwan me mon pa antren li. I menm menas mwan kalot me mon pare ek mon delwil so ki mon pe fri pwason pou bril li si i tap mwan.

I ale, i al dan salon. Mon tann li mangonn mangonnen laba konmsi en dimoun fou. I soufle, i sante, i bat latab, napa ki i pa fer ek sa lefe bwar. I pa dan okenn traka, e napa naryen pour li fatig son latet avek. Lavi pour li i gou, vreman gou e i bezwen anmize nwit e zour.

Olye fer tou sa bann ensinifyan aköz i pa priye pour manman kapab sorti. Aköz i pa'n vin azen e i ti a kwi manze e mon ti ava al netway lakaz ki mon pa ankor netwaye depi bomaten. Me la ler ki'n arive, 5 er pe sonnen, mon a bezwen netway en sel demen bomaten.

Demen osi mon a bezwen fer li kwi manze e si pa oule, mwan osi mon pa pou kwi. Mon kapab pa manze pour en zour antye tandiski li si i pa ganny son manze, konmsi i a mor. Mon annan lakaz pour netwaye, en gro balo lenz pour lave, lakour pour balye, tousala. Napa person ki pou al kot manman demen, e mon krwar i a bezwen konsansye e ai en kou obor dife.

Finis kwi manze mon pas dan salon, e mon ganny en sezisman, lakoler, laraz tousala ansanm. Misel in rann tou son bwar dan salon, lo bann meb partou. I'n roul ladan li osi e son latet in benyen avek son vom. Li, i pe ronfle sonmey. Mon get li mon ganny maloker. Mon ganny lanvi vom mwan osi. La i'n sali lakaz mwan ki bezwen al netwaye.

Ki ras zonm manman in al rode! Papa zanmen ti kounmsa. Zanmen i'n deza vom dan lakaz menm si lakaz ti pour li. Zanmen i'n deza vin sou ziska sa degre parey sa bebet in vini ozordi. Mon menm ganny lanvi pour mwan batonn li kot i pe dormi ater avek en bon baton.

"Ton Misel lev la ater. Ou pa war ou pe dormi dan vom."

"En! en! en!"

"En kwa. Ou'n larg ou ta malpropte e ou pe dormi ladan."

"Florans pa kriy avek mwan. Tyonbo mon lanmen mon a leve. Ou menm ou ki mon fanm, mon kontan ou bokou vin lev mwan."

"Gete mon'n fatige dir ou aret fatig mwan. Aret dir mwan mon ou fanm. Mon pa fanm person mwan."

"Me ou en pe difisil konpran. Vin lev mwan e apre mon ava kares ou an rekonpans. E okontrer taler, nou pou dormi ansanm lo menm lili."

"Non mersi, ou ava reste lanmenm ater kot ou ete dan ou vom. Ler manman i retournen ou ava repet avek li tou sa ki ou pe dir mwan. Mon'n ase donn ou sans."

"Al dir li konmela menm. Mon anvoy li merd. Sa ki mon konnen ou ki mo fanm, pa li. Mon pa bezwen sa vye fanm."

Laraz i marse dan mon lekor antye. I annan en pti latab lanmenm obor mwan e mon ganny lanvi pour tap li avek.

Mon anvi fer li en dimal, mon anvi donn li en mark arete. Me wi, ozordi mon pou bezwen tap li. Mon'n nepli kapab siporte. I'n ganny ase sans. Mon anvoy mon lanmen pour tyonbo latab, me lanmen pa oule ale. Konmsi i annan en lema ki pe redi li deryer. E menm en lavwa pe koz avek mwan dan mon lespri.

"Non Florans pa fer sa. Ou a ganny en malediksyon. Les li, i sou e i pa konnen ki i pe fer. Tyonbo son lanmen okontrer e lev li ater. Mon ekout sa lavwa byen atantivman. I pa dir mwan plis ki sa, me i bes mon laraz en sel kou. Mon ale e mon lev mon boper ater. Mon fer li asize. Apre mon pran en kivet, mon ranpli li avek delo e mon konmans netway salon. Mon bat delo partou e tir sa bann move loder larak. O moman ki mon fini 7 er, i sonnen. Mon al pran mon ben e apre mon fer li al pran pour li, sansan i pou al dormi koumsanmenm parey son labitid ler i sou."

Lannmen mon lev granmaten e mon konmans debourye menm. Si mon pa konmans byen boner, tanto mon pou war ki pou reste ankor louvraz ki mon pa ankor fer parey yer. Mon prepar gadyak, balye lakour, fer isi, fer laba san en pozman. Me konman mon al pran mon balo lenz pour al lave, mon ganny ankor en sezisman parey yer swar. Me sa voyaz olye annan laraz, mon annan lazwa, lakontantaman e mon reste nek an souriyan.

Manman pe vini dan lale avek son piti. I paret byen fatige e alors mon al zwenn li. Mon pran piti avek li e mon anmennen.

"Oli Misel, pa mon ti dir li vin zwenn mwan ozordi aköz mon pe sorti!"

"Me i ankor pe dormi. I pa'n nonm ditou si ou pe sorti. E osi mannyer i ti ete yer, i pa ti pou kapab mazin naryen."

"Kisa i ti sou?"

"Ou'n fini dir oumenm. Si ou ti war son degenn yer swar manman, mon krwar ou ti pou bezwen fer li en dimal dan son soulezon. I'n vomé dan salon, i'n roul ladan e mon'n bezwen netway salon ziska 7 er diswar."

"Me i ti sorti kot mwan azen yer. Petet i'n zwenn son bann bebet i'n tonm dan ta."

"Mon dakor ou'n dir son bann bebet aköz li osi i enn. Me manman oli ou valiz?"

"Valiz mon'n kit lopital. Mon'n esper li pour li vin zwenn mwan e i pa'n vini. Mon'n kit valiz e i pou al ser mon valiz deswit. Konman manman i ariv dan lakaz, i al direk kot Misel e avek en laraz, i fer Misel lev deswit pour al sers valiz. Misel i leve byen kanmi. I pa reponn manman en sel mo, zis i foulkan i ale. Deswit i retournen avek valiz e ler i arive, i al kwi manze. Mon krwar i konnen ki mwan osi ozordi mon pa ti pou kwi okenn manze."

Bann zour ki swiv, tou keksoz i mars normal. Misel i azir konsansye e i ed plis kot lakour. Mon fini perdi kouraz pour mwan dir manman sa ki mon annan pour dir li ki depi lontan mon pe kasyet. Apre tou osi, konmela i pa dir mwan sa bann parol ensinifyan ditou. Petet prezan ki i'n fer en zanfán avek manman i ava sanze. Sa de trwa zour mon pas obor li, mon antre dan lakwizin pandan ki i pe kwi manze e i pa fer naryen. Okenn lanmen i pa anvoye pour tous mwan. Mon konmans napa okenn lafrefer pour li. Dan aswar menm ler nou fini dinen, nou lav zafer sal ansanm deor e manman i lwen dan lasanm avek piti. Me ankor Misel pa fer naryen. Si son lanmen i arive tous avek mwan, mon konnen i pa'n fer par ekspre.

"Me koumsanmenm mon oule ou viv mon boper. Mon konmans napa traka, keksoz i konmans amelyore. Aköz toutan ou pa'n azir parey? Me fer atansyon osi plitar ou pa konmans ankor ...!"

Demen lantre lekol e prezan mon ava annan sa gou pour aprann. Mon ava remet mon lespri ankor dan leson e mon bann ansennyan, prensipalman Mis Mari, zot ava fyer ankor avek mwan. Fer atansyon Marime. Ou'n sorti premye dernyen vakans e ou'n pran mon plas. Me mon pe vini konmansman demen pour ou. Mon pe vin montre ou ki mon nivo akademik i bokou pli o ki pour ou e ki ou'n ganny en sans dernyen vakans. Me demen mon pe vini pour ou. Prepar ou aköz mwan, mon'n fini prepar mwan.

SAPIT 4

Parey labitid, ozordi mon'n lev byen boner. Mon ouver lapor e get deor, soley osi in konmans aparet lo lorizon e mon santi mwan fyer. Mon kontan ler i fer botan sirtou ozordi ki larantre lekol.

Kat semenn vakans in pas vreman vit. Mwan mon pa'n anmiz ditou pandan sa vakans e okontrer mon'n reste debourye sak pti segonn. Mon'n monte desann, mon'n fer isi, mon'n fer laba. Mon'n fatige, gro transpirasyon in koule groser ledwa me mon pa'n arete. Ler ou annan en lakour kot ou bezwen debourye, deboury bokou menm, ou bezwen obliy lafatig e menm lanmizman.

I premye vakans ki mon'n debrouy sa degre e sa i fer mwan war en sanzman avek lavi.

Ler en zanf an i ankor pti, napa bokou louveraz ki i kapab fer. Me pli i grandi, pli son laz i ogmante, son louveraz osi i ogmante. I deboury plis. Mwan, mon pe grandi, e i normal ki mon annan plis louveraz pour fer. Mon azir konsansye e mon war ki mon devret fer li.

Fini okip mon lekor, mon pran mon gadyak e apre mon dir orevwar e mon desann pour vin kot sa lekol. An desandan, mon pa tro fer okenn refleksyon parey mon ti fer zour vakans. Mon annan lazwa pour retrouv sa lekol e travay pli byen. Sa ki'n pase, in pase. Pa toultan ki mon devret mazin lepase me okontrer mon devret get devan mwan. Mon bezwen la rearanz mwan. Mon ledikasyon i bezwen reganny son plas kot i ti ete avan e menm depas sa nivo e mont pli o. Me wi, mwan Florans, mon a bezwen al fer sa pandan sa trimes. Pa bon perdi ni lespwar ni kouraz dan lavi.

Mon ariv kot lekol byen boner marmay osi in deza arive e pe netwaye. Mon al met mon sak dan laklas e mwan osi apre mon pran en balye e mon donn lanmen netway lari lekol ki depi kat semenn pa ankor ganny en kou-d-balye.

Sanmenm sa nou premye aktivite ki nou fer kot lekol ler larantre in arive.

Pa zis nou marmay ki netwaye, bann ansennyen osi zot vin ede e sa i ankouraz nou bokou. Anmezir plis marmay i vin donn en kou-d-men, lari lekol i vin pli prop. Laklos i sonnen selman ler tou in pare.

Nou antre dan nou laklas e sakenn i pran son plas. Me pa bezwen dir ou, nek ou pe tann: "Konman ou'n pas vakans?"

Mon'n al isi, mon'n al laba. Mon'n ganny sesi, mon'n ganny sela. E tapaz i bouse dan laklas. Tou pe rakonte konman zot in pas vakans e selman zis mwan ki reste trankil. Mon napa naryen gou pour mwan rakonte.

Mis Mari i annan bokou keksoz pour dir nou li osi. Marime, Solanz ek Miki zot ganny felisite aköz zot in sorti premye, dezyenm e trwazyenm trimes pase. Tou kou mwan ki ti abitye ganny felisite sa letan e mon ti konnen byensir ki ozordi mon pa ti pou gannyen.

Ozordi osi, i annan en keksoz ki ganny fer me ki zanmen i'n deza ganny fer avan, "Degradasyon." Mon etonnen ler mon tann Mis Mari dir: "Ozordi pour premye fwa nou pou bezwen fer degradasyon ek promosyon. I annan en etidyan dan nou laklas A ki pou bezwen desann direk dan C e i annan de etidyans dan B ki pe ganny promosyon e vin isi dan A.

Mon leker i konmans bate, kantmenm i pa ankou dir lekol sa dimoun ki pe desann dan C, mon konnen i mwan. Mon tir mon bann zanfer ki mon ti'n met dan biro e remet dan mon sak byen trankil me Mis Mari i war mwan osi.

"Florans ou toutafe annan rezon pour tir tou ou dokiman dan ou biro pour met dan ou sak aköz se ou menm ki pou bezwen desann dan C."

Tou mon bann kanmarad i konmans get mwan, e mon santi mwan vreman anbarase. Marime i kas en gran riy e apre lezot i pran ansanm avek li.

Personn pa sagren mwan e konmsi zot tou zot pe dir mwan ale menm. Mon leve e mis Mari i kondir mwan ziska kot laklas C. Ankou laba konman mon antre, tou lizye i lo mwan konmsi mwan en etranze kot sa lekol.

Zot in prepar en plas pour mwan dan dernyen ranze laklas dan milye de garson, Ivon ek Andre e mon santi mwan en pe nerve.

Sa laklas 7C se sanmenm laklas ki mon'n toultan aye. Bann etidyan sa laklas zot ganny nonmen konman bann bourik. I enn bann laklas pli enferyer kot sa lekol. Zanmen zot ekout profeser e en lazournen antye zis zot fer tapaz e distrer bann lezot laklas. Zot rezilta apre i ki toultan zot pa reisi dan legzanmen e laplipar ansennyan in degoute pour montre leson la. Ozordi, mwan Florans, mon'n ariv parmi. La konmansman ozordi mon pou ganny gete konman en bourik e en dimoun vreman bet. Mon pa pou kontan ki lezot marmay i kriy mwan bourik. Mon a kapab vin agresiv avek zot.

Me non, mon krwar mon a bezwen travay vreman dir e mon ava retourn ankou dan 7A. Si zis selman mon boper pa konmans son bann vilen manni ankou. Oubyen si napa problem ki pou fatig mwan ... Mon a bezwen vreman fer mon mye, mon a met tou mon lespri dan leson en mannyer ki trimes prosen mon a sorti la, dan sa laklas tapazer.

Sepandan mon pti frer dan lakour pe vreman refer lekor. Prezan i pe ganny son groser e son figir osi pe sanze. I'n nepli fay. Yer swar nou'n rod en non pour donn li aköz manman pou al deklar li ozordi. Mon ti propoz non 'Mervin' e manman ek Misel ti byen kontan sa non. Lo kote sinyatir i'n ganny sinyatir manman 'Morel' e mon kontan ki i osi sinny menm sinyatir ek mwan, ki olye i al ganny sinyatir 'Bristol' ki sinyatir Misel.

Bomaten nou'n desann ansanm nou de manman ziska kot lekol e apre i'n pran bis, i'n al deklar piti anvil.

Apre lekol mon esper li aköz i bezwen pas kot enn son tantin Pti Pari e pas en lazournen ansanm.

Misel pe debrouy tou kot sa lakour dan san konze 21 zour. I'n konmans koupay deryer lakaz pour plant enn de pti legim pour nou konsonmen. Ozordi osi, mon'n fer li ouver de trwa barik vid pour mwan plant fler ladan. Koumsa zot ava reste pli lontan e grandi pli vit ki olye ler mon plant zot dan bann pti bwat parey bwat dile Nido. Avek tousala, mon

pe reganny vreman lazwa pour viv kot sa lakour. Mon nepli ganny lanvi pour sove kot lakour prezan, e traka osi pe fini. Mon war ki mon boper pe sanze e mon konmans santi mwan fyer ki mon annan li. Me sa lafyerte i pa plis ki ler mon papa ti ankor la byensir.

La konmela dan aswar mon nepli ganny sofe obor dife. Manman par ler i kwi manze limenm me lapliparditan Misel menm ki kwi. Mwan, ler mon sorti lekol, mon lav bann zafer sal si i annan e apre mon al vey mon pti frer, Mervin. Par ler i benny mwan avek son pisar e mon bezwen al resanze. Mon pran li dan mon lebra e mon pronmnen avek li partou. Mon war i gou prezan ler ou annan en pti frer oubyen en pti ser. Me eski i gou ler se ou ki'n fer sa piti, ler ou'n vin manman? Ou'n bezwen al maternite e soufer pour delivre li. Si i napa lapeze, ou ava reste pli lontan e ler ou mazin ou lakour i donn ou lanvi sorti. Apre ki ou'n ganny en zanfán osi, ou lekor i sanz en pe! Manman menm mon war ki i'n megri en pe e mon konn ankor madanm ki apre fer en piti zot in sanze.

Sa i fer mwan war en keksoz. Lontan ler mon ti ofans manman, toultan i ti dir mwan ki mon pa konnen mannyer i'n soufer pour met mwan lo later. Sansan ou pa ti pou fer tousala, i ti azoute. Me vre mon pa ti konnen e ozordi mon pe war pour mwanmenm. I vre ki nou manman i soufer en kantite pour met nou lo later. I annan zanfán, menm si zot in gran pa ankor kapab rekonnet sa.

Mwan Florans, pour mon 12 an, tousala mon pe konmans realize. Mon lize i gran ouver e mon war tou e serten keksoz i fatig mon lespri. Serten mon pa trouve par kimannyer i vini. Sa bann mon pa ankor ganny eksplike lo la.

Depi de trwa zour mon santi mwan pa byen. Mon lekor antye i fermal e mon ganny soulezon ler mon mars pour en kantite letan. Dan laklas menm mon ti'n byen konmanse avek mon leson me la mon pa tro kapab konsantre aköz lekor fermal. Semenn pase mon ti al kot dokter e zot ti fer mwan anmenn mon lirin pour analize. Zot ti'n demann mwan pour vin get rezilta demen.

Lannmen alors mon lev gran boner e mon desann. Mon osi anmenn mon sak lekol avek mwan aköz mon konnen mon pou fini boner laba e mon ava al lekol. Mon pa kontan mank lekol san en bon rezon valab parey i annan de trwa marmay ki kontan manke. Deswit konman mon ariv klinik mon al kot sa ners ki ti pran mon lirin.

En zenn pti ners dan son 25 an. Lapo byen blan. I annan en gran lake seve ki bat lo son ledó e dan bout lake seve toultan i kontan met 2 pti tokenn rouz. Son lekor in byen devlope e i toultan annan en sourir pour tou dimoun, ki swa ou en etranze oubyen son zanmi. I en ners byen zantiy.

"Florans, nou pou bezwen al dan en lasanm prive nou de aköz mon bezwen koz avek ou an prive."

Mon swiv sa ners e anmenmtan, mon pe demann mon lekor bokou kestyón. Sa mo prive, koz avek mwan an prive, i sirkile dan mon lespri. Aköz? Eski mon maladi i drol? Eski i grav e napa gerizon? Pa dir mwan i sida aköz i pa ankor dekouver isi Sesel e pa dir mwan ki mon ... Vreman sa ners i anmenn mwan dan en lasanm prive e konman nou arive, i demann mwan en bann kestyón ki zanmen mon'n deza ganny demande avan.

"Eski ou annan en bouldou, e kan ki ti zot dernyen sorti e konbyen fwa zot in sorti?"

Mon pran en gran respirasyon avan ki mon kapab reponn. Mon leker i bat pli vit ki labitid. Parol pa tro oule sorti avan, me apre i sap mwan.

"Non, mon napa okenn bouldou."

"Florans, koz laverite."

"Me i laverite. Mon napa personni ni kot lekol ni okenn par."

"Me zanmen ou'n deza sorti avek en garson kantmenm i pa ou bouldou?"

"Non, zis selman ..."

"Zis selman kwa? Ale koze Florans pa bezwen per naryen."

"Me aköz ou pe demann mwan sa bann kestyón? Ki i arive avek mwan?"

"Mon pou dir ou ki i ariv ou. Me dir mwan ek ki ou'n sorti."

"Mon pa'n sorti avek personn."

"Florans, ou pe koz manti la. Ou'n bezwen sorti avek kelken tou dernyerman."

"Me kimannyer ou konnen?"

"Larepons i fasil. Me les mwan demann ou en lot kestyon. Depi kan ou pa ankor war."

"War! Me ners mon napa problem avek mon lizye. Mon war byen mwan. Mon lizye i ankor parey labitid."

"Florans non, mon pa pe nonm ou lizye."

"Me ners, me avek mon lizye ki mon war."

"Florans mon a eksplike, mon pe demann ou depi kan ki ou pa ganny ou peryod. Ou konpran mwan prezan?"

"Wi mon konpran, me aköz ou oule konnen?"

"Florans dir mwan, ase demann mwan kestyon."

"Ou pou konnen taler aköz mon pe demann ou tousala."

"Ners, mon gannyen mon peryod, me depi de mwan pase, mon pa ankor gannyen."

"Me ou konnen aköz ou pa gannyen?"

"Non, mon pa konnen, alors sanmenm ki pe fer mwan malad?"

"Florans, si ou pa ganny ou peryod, i vedir ki ou ansent."

"Mwan! Zot pa dir mwan sa. Mon per."

"Mon konnen ou per. Me sanmenm ki pe arive. Dir mwan prezan ek ki ou'n sorti."

"Ners, wi, mon'n deza sorti, me selman mon pa pou kapab dir ou avek lekel."

"Me si ou pa kapab dir mwan, alors dir ou manman. Kekfwa ou a pli kapab koz avek li."

"Pli move ankor ners, ou pe anvoy mwan ganny lanmor. Touy piti si vre mon koumsa. Touye ners. Mon a pey ou. Mon pa'n rode, i'n vin par aksidan, touye ners."

"Non mon ser, mon pa kapab fer keksoz parey. Ou dir mwan par aksidan, me kimannyer? Ale rakont mwan."

San reponn ners sa kestyon, mon sorti dan son lasanm avek en lavites e mon sot lo semen an tayan. Mon oule fol. Mon anmenn mon latet dan mon lanmen. Mon taye konmsi en droger apre ki i'n fim son drog. Dimoun i get mwan e mon pa antren personn. Mon pa kapab al kot lekol, mon pa pou tann ditou leson. Mon pa pou antre dan lakour osi. Misel in konmans travay semenn pase e mon a esper li ler i a retournen sorti travay e mon ava mont dan lakour avek li e mon ava osi dir li sa problem. I sel dimoun ki mon kapab koz avek e i pou bezwen rod en solisyon deswit. Si mon'n arive ansent, mon'n ansent pour li pa pour personn lezot. Mon ti'n krwar problem ek traka in fini pour mwan me saler zot ti ankor la. Zot ti ape tyek mwan. Tyek tou mon demaraz e la zot in sorti ankor pour mwan.

Mon asize lo en ros obor semen mon latet i ankor dan mon lanmen. Mon bezwen pez li byen for aköz i oule ouver. I oule fann an de.

Menm moman osi, mon mazine ki mon'n obliy mon sak lekol klinik. La mon krwar i a bezwen reste laba menm. Sa ners kekfwa i ava anmase kantmenm mon'n sorti kot li dan sa fason brit.

Ler Misel i monte, i etonnen pour war mwan la koumsa. I debout i get mwan e i pa koze. I'n sirprann, i'n sezi, i'n tou limenm. Mon ti ape ekspekte li sirprann menm ler i pou war mwan la e alors mon konmans koz avan.

"Pa bezwen ki ou etonnen si ou war mwan la ozordi. Me mon per e mon ti ape esper oumenm."

"Kisa ki fer ou per? Depi ler lekol in large ou la?"

"Mon pa'n al lekol ozordi!"

"Me depi bomaten ou'n desann ou la? Me aköz, ki i arive?"

"Ton Misel nou dan en gro problem. Pli gro problem ki ou kapab mazine."

“Ki ras problemn Florans. I’n ariv maler dan lakour? Pa dir mwan ki Mervin in mor oubyen ...!”

“Non, pa met lanmor lo personn. Sa problemn i ant nou de.”

Figir mon boper i sanž kouler parey kanmeleon. Lo la, i pe montre en kantite lekspresyon. I larg son sak travay ater e son bann sopin ki ladan i rezonnen. I koste mwan e pour premye fwa olye li tyonbo mwan, mwan ki tyonbo son lanmen okontrer.

“Ton Misel nou dan en gro problemn. Nou bezwen rod en solisyon deswit avan ki tou keksoz i vin kler.”

“Florans ale, dir mwan lekel sa problemn. Mon a gete ki mon kapab fer.”

“Ton Misel, bomaten mon’n al klinik akòz depi de trwa zour mon pa santi mwan byen. Me laba zot ti’n dir mwan ki mon an vwa- d-fanmir.”

“Florans non, zot pa’n kapab dir ou sa!”

“Zot in dir. Zot in menm fors mwan pour dir avek ki mon’n sorti me byensir mon pa’n dir zot larepons.”

En ners ki ti ape koz avek mwan e i dir mwan koz avek manman lo sa size me i pa en keksoz pour mwan fer. Mon pa anv i ganny okenn piti sa laz. Mon fanmiy pou onte, zot pou rezet mwan. Alors Ton Misel mon konnen i pou ou, zis ou ki’n deza sorti avek mwan e silvouple annou fer en mannyer nou a touy sa piti avan ki i fini devlope. Fodre nou degaze, avan ki mon vant i konmans ganny son bon groser.

“Florans pa tro fatig ou avek sa. Mon pa anv i ki ou fol. Mon konnen ki feyaz mon a kapab rode pour ou bwar e touy sa piti. Tou keksoz i dan mon lanmen. Me fer atansyon, pa dir sa Titin, ni personn kot klinik. Sis er pe sonnen, annou ale. Pa fatig ou plis ki sa.”

Nou monte e konman mon ariv dan lakour, mon sot direk lo mon lili. Mon latet i tro lour ozordi e mon likou pa kapab siport son pwa. Sa swar ni dinen pa donn mwan lanvi. Plitar mon leve, mon pran mon ben e apre mon demann manman de panadol e mon anvale. I kalmi mon latet en pe.

Me sonmey pa vin ditou. Mon vire devire lo lili. Tou pozisyon pa bon pour mwan. Mon absoliman en dimoun fol e mon krwar ki mon’n bezwen perdi lespri ozordi.

Ki sa feyaz mon boper pou rode? kan i pou anmennen? Fodre pa ki i tarde avek. Sa feyaz i a kapab fer mwan dimal si i oule, me si i touy sa piti ase. I pou vilenn pour en zenn zanfàn douz an parey mwan pour marse avek en gro vant. E pli vilenn ankò, vant pour mon boper. Mon pou ganny mal koze. Mon pou bezwen kit lekol, manman pa pou oule mwan e okenn mon fanmiy osi. Mon pou ganny gro latet kot mon pou marse e mon bann kanmarad lekol pou sifok mwan. Zot pou riy mwan e mon pa kapab mazinè ki mon bann ansennyan pou dir. Mon ledikasyon pou gate e plitar mon pou napa en bon lavenir. Tou mon sans pou perdi.

Mon lekor i ankò tro pti e mon pou vreman soufer en kantite pour nobou delivre piti. I pou vin konplike e en maladi i a kapab frap mwan apre fasilman. Me wi Misel, rod sa feyaz deswit. Mon pare pour bwar. Mon pare pour sa lavortman.

Lannmen mon leve e mon pa kapab al lekol. Mon zwe malad avek manman e i dir mwan reste. Mon zis al sers mon sak klinik. Ners ti’n anmase e konman zot donn mwan mon sak, mon retourn deswit lo menm pa. Granmersi pa sa ners yer ki la pour kestyonn dimoun ankò. Dan lakour mon pa kapab fer naryen. Pour vey Mervin mon pa ganny lanvi. Manman pe okipe menm ale vini e mon pran Mervin mon met li dan son ber. Mon donn li en pti tediber e i zwe avek. Dir granmersi i pa fer lasasen. Ler i ava plere, mon a konnen i swaf e mon a donn li son bibron.

Aswar Misel i vini e deswit mon al kot li. Mon al gete si i’n gannyan sa ki i ti’n pronmet.

“Florans mon’n fer rode. Zis pran pasyans ziska demen. I annan en madanm ki travay ansanm avek mwan, e i konn byen bann raspay ki bon pour bwar. Mon’n donn li 100 rounpi ozordi e demen i pou anmennen pour mwan. Solisyon nou pou trouve, mon asir ou Florans.”

“Me wi, me si kantmenm mon bwar i pa touy piti!”

“Non, i pou touye piti. Sa madanm pou eksplik mwan demen konman pour servi. Li osi i’n deza”

“Pa kontinyen mon’n konpran. Alors li osi i’n deza servi. Me ou oule dir mwan ki ou’n al dir li akfer ki ou pe rod sa bann raspay?”

“Non, mon pa’n dir li. Sa pa konsern li. Mon’n pey li e i annan pour li anmenn mon zafer san demann mwan okenn kestyon.”

E osi Florans mon’n zwenn sa ners ki ou ti ape dir mwan yer e mon’n koz avek li. I’n promet mwan ki i pa pou dir sa personn, me i oule ki ou vin konsilte detanzantan.

“Savedir ou pa’n dir li mon pe al fer lavortman!”

“Wi se sa, mon pa’n dir li sa akoz i a kapab fer nou ganny zafer. Mon’n anbet li an dizan mon pou sonny sa piti ler ou gannnen, kantmenm pa pour mwan, mon’n fer li krwar, e se akoz sanmenm sa ki i dir mwan fodre ou vin konsilte, me i pa pou pens personn lo sa ki pe arive.”

“Ni avek manman i pa pou dir?”

“Wi, i’n promet mwan i pa pou dir Titin osi. Sanmenm sa mon dir ou pa bezwen fatig ou latet. Tou keksoz i dan mon lanmen.”

Lannmen swar, vre mon boper i vin avek sa bann raspay. I en bann lekors anvlope dan en pti sak plastik. Manman pa war ditou ler Misel i donn mwan sa sak plastik.

“La la, mon’n gard mon promes. Veye ler ou manman pa pe antren ou. Bwi en pe delo, ler delo in bwi, devid li dan en lanmok e met en pe sa bann lekors ladan pour efize. Apre ou a kapab bwar.”

“Me fodre mon bwar zis pour ozordi menm?”

“Non, tou le zour ziska ler i fini. Me pa les Titin war sa, sansan ou konnen ki pou arive si i al konnen sa ki pe pase.”

Bann zour ki swiv, mon fer parey mon boper in dir mwan fer. Tou le swar mon veye ler manman pa war mwan e mon bwar mon gonaz. Dan lekol lannmen, i reste brouy dan mon vant e i fer mwan feb. Mon ganny lanvi manz pli bokou e deswit manman i remark sa.

“Florans, de trwa zour zanmen manze i ase pour ou. Ou pa ti manze koumsa avan, ou ti napa sa lapeti. Ki ou fer konmela ki ou manz bokou?”

“Naryen manman, zis konmela pli mon manze, pli mon vant i demann mwan.”

“I byen drol!”

“Non, napa naryen ki drol. Mon vant i demann mwan e mon pa kapab refiz li, sansan i pou fer lever soliter koz mwan koze mirak. Manman i riye e mwan osi, mon fer en pti riye. Me mon pa pe riy avek li, mon pe plito riy li.”

Pov li, i pa konn naryen ki pe pase. I toultan la konmsi i pa la. Keksoz i pas obor son lizye me manman pa war ditou, i pa ni menm santi. Ouvrer en pe ou lizye mon manman, ouvrir ou a war keksoz. Keksoz ki a kapab fer ou kite avek ou mari e menm pa oule mwan pour lavi. Wi, ouvrir ou lizye pli gran mon manman, zot tro fermen.

Mon bwar tou sa bann lekors dan 11 zour, tou, en sel bout pa reste. Ners i demann mwan tanzantan pour vin konsilte e premye konsiltasyon ki mon al fer apre ki mon’n bwar sa bann raspay, ners i reste etonnen pour konstate ki piti in disparet. Mon sot lo semen avek bokou lazwa. Sa gro problemn in rezoud. Pour mwan, sa i en laviktwar e osi i en bon leson. Tanto ler Misel i retournen sorti travay, mon a bezwen fer li konpran ki fodre i aret son bann manni konpletman sansan i ava kapab ariv problemn pli grav ki sa enn e i pa pou zanmen kapab trouv en solisyon. Gras a li si toultan mon dan problemn e alors mon a bezwen pour dernyen fwa fer li konpran ki sa ki i fer i mal.

Me mon krwar, mwan osi mon bezwen realize ki mon’n fer en gran pese. Mon’n touy en pti inosan e mon konnen Bondye pa kontan ditou. I en krim, i en pese grav, i enn mon pli gran pese. Me mon’n bezwen tir problemn lo mwan. Ti napa en lot pli bon solisyon. Me pardonn mwan Bondye. Konpran mwan, i ti mon sel solisyon, pardon.

SAPIT 5

Aprè sa lensidan ki mon'n pas ladan, en pe keksoz pour mwan i retourn normal, me en pe osi, zot lanmenm la pe fer move latet avek mwan. Zot in teti e pare pour fatig mon latet e sak fwa ki mon anvi mon lavi otreman. Mon'n koz bokou letan avek mon boper, mon'n flat li pour li pa repet ankòr son bann vilen manni. Me mon pa'n anvi ganny en repons avek li. Sak fwa ki mon dir li ki mon pa anvi ki i fer tousala ankòr, i reste nek souffle. I menm sante. Mon napa konfyans dan li. Mon ankòr per li e i zis ki mon napa sa kouraz pour abòrd manman lo sa konversasyon. Si mon ti annan sa kouraz, lontan menm manman ti a'n konnen sa ki pe pase. Menm si Misel tou sa letan i pa ankòr fer naryen, mon pa kapab dir ki i pa pou fer. I tou depan lo li. Petet i pe esper mwan ler mon fini lekòl parey i'n dir mwan, e si son rev i koumsa, mon krwar zanmen i a vin vre. I ava rente, gro transpirasyon i a koule lo li si i a esper mwan pour vin son fanm. Si i krwar mon napa konsyans pour kit bann garson dan mon laz pour mwan antren mwan avek li.

Ozordi konman mon ariv kot lekòl naryen mon pa ankòr fer e Silvya i donn mwan en nouvel ki mon pa oule tro krwar. Li, zanmen i napa en nouvel pour donn dimoun e marmay i konmans donn li son pti non barok, "Fanm nouvel." Son bann nouvel osi ki i gannye foudre i azout son bout avek pour fer pli gou. Si nouvel i kourt, li i fer vin pli long. Lo sa ki ozordi i pe rakonte, mon bezwen zis ekoute e pa dir naryen. Mon pa oule tro krwar kantmenm mon pa les li remarke.

"Florans, me ou, ou pa lo later ditou mon ser. Keksoz pe pas isi menm Lans Rwayal e ou pa tandè! Mon ser ou oule dir mwan ki ou pa'n tandè ki Edwiz pe al ganny piti! Ou pa trouve ki i annan de semenn i pa vin lekòl."

"Edwiz! Me! me pour ki sa vant?"

"Mon pa ankòr konnen, mon ankòr pe enformen menm, mon ser.

Dek ki mon a konnen, mon a vin dir ou. Eksa, son papa pa oule li, i pe pous li me son manman pa oule ki son papa i fer sa. La tou le swar ou tann dispit laba. Sa ki kriy lasasen i kriye. Si ou krwar mon manti, mont Boukenvil tanto ou a tande.”

Pour monte ... wi mon pou monte Boukenvil, e mon pou osi ariv kot lakour me mon pa pou fer li tanto. Demen bomaten mon a fer li. Mon pou bezwen al gete si sa i vre. Nou de Edwiz nou annan menm paren ek menm marenn. Mon pran li konman mon ser. Si sa problem in ariv li, si Silvy a pa’n bat mon latet, mon bezwen ed Edwiz kot mon kapab. Mon pa pou les li mor koumsanmenm lo bor semen. Mwan osi mon’n fek sorti dan menm sityasyon e mon a gete ki mon kapab fer.

Lannmen an sortan lekol mon al kot Edwiz, Boukenvil. Ler mon ariv laba tou i trankil, tou i tris. En pti tapaz mon pa tande, me dek ki mon dir bonswar, en pti latet i sorti par lafnet. En pti lavwa i dir mwan vini. Mon aproz e Edwiz i debout devan laport i esper mwan. Zis konman mon war li, i konmans fer mwan lapenn.

Kantmenm son lekor i byen devlope, Edwiz i ankor annan selman 14 an, pa plis ki sa. Sa ki Silvy a in dir mwan yer mon war ki i vre, menm si mon pa ti oule krwar. Mon krwar i pli bon ki mon war pou mwan menm.

Vant Edwiz in konmans ganny son pti groser. I’n met en rob rouz byen larz ou a dire en rob-de-sanm. Larm pe koule lo son pti lazou e mon annan pour mwan al konsol li kantmenm mon larm osi i anvi koule.

Mon koste pli pre avek li e i fer mwan antre. I ofer mwan en sez e i osi asiz lo enn dan bor mwan. Deswit mon remarke ki i litousel kot lakour e napa letan alors pour perdi. Mon a bezwen sekour li.

“Edwiz, mon’n ariv kot ou ozordi aköz yer kot lekol ‘Fanm nouvel’ in rakont mwan ou maler. Mon pa’n oule tro krwar li e mon’n vin gete pour mwan menm. Me Edwiz konpran mwan, mon pa vin vey zaksyon, mon oule selman vin ed ou.”

“Florans, mon konnen ki ou’n vin ed mwan. Depi ler ou’n debout

deor ou’n montre mwan sa lo ou figir. Me, mon pa krwar si ou pou kapab ed mwan.”

“Pa ganny en doutans parey Edwiz, mon pa kontan war ou dan sa maler.”

“Mon konnen ki ou pa kontan mon dan sa problem, me pa mwan ki’n rode. I par aksidan ki mon’n arive koumsa.”

Konman Edwiz i dir mwan sa, mon pa reponn deswit. I fer mwan mazin pour mwan ki mon pa ti rode mwan osi. I fer mwan mazin sa zour klinik ek sa ners. Konmsi ozordi mwan mon’n vin sa ners e Edwiz in vin mwan. Mon krwar ki Edwiz i remarke ki mon pe mazin keksoz. I koze e sa i tir mwan dan sa mazinasyon deswit.

“Mon papa ek sa pa oule krwar si i’n vin par aksidan. I oule ki mon dir li ek ki mon’n sorti me mon pa konn li sa dimoun.”

“Kwa Edwiz? Kimannyer ou sorti avek en dimoun ki ou pa konnen? I byen drol.”

“Florans pour drol kekfw a i drol, me mon’n ganny vyole.”

“Vyole? Me kimannyer? Depi kan?”

“Mon ti sorti bal en zour swar. Mon ti pe monte mwan tousel, me avan ki mon ti ariv dan lakour, en loto ti aret obor mwan. Ti annan zis en zonm ladan. I ti ouver laport loto, e i ti sorti e vin lo mwan. Mon ti konmans per. E mon lekor antye ti konmans tranble.”

Ler mon ti mazine pour mwan taye, i ti’n fini atrap mwan. Menm si mon ti kriye, person pa ti tande. I ti trenn mwan dan loto e apre i ti demar son loto ek en vites. Mon ti kontinyen kriye kantmenm mon ti dan loto e person pa ti tande byensir. Ler i ti ariv Pwent-O-Sel i ti aret loto.

I ti tir en kannif dan son loto e fors mwan pour al lo lans avek li. Mon ti ankor bezwen mon layi e mon ti per pangar i a touy mwan avek sa kannif e alors mon ti ale, e apre ou konnen ou menm ki ti arive. Ler i ti fini, i ti retourn ek mwan e larg mwan kot i ti zwenn mwan. Mon ti mont dan lakour e mon pa ti dir mon paran naryen. Mon ti zis plere.

“Me Edwiz, ni pour koz avek sa zonm ou pa ti koze? Ni pour demann li son non?”

“Mon ti demann li son non ler i ti ape retourn avek mwan me i ti zwe pa tande.”

“Me aköz ou pa ti get limero loto?”

“Mon ti obliye gete e i ti selman ler mon ti ariv dan lakour ki mon ti mazine ki mon ti devret gete. Sa pa’n pas dan mon lespri ditou. Ler ou dan en gro malè, ou paret obli tou keksoz.”

“Edwiz ou ti merit pe al bal avek en dimoun, pa ou tousel ou laz ki ou annan.”

“Florans ou konnen mon napa ni frer ni ser e alors mon bezwen al mwan tousel. Edwiz ti’n aret plere en moman, me la son larm i konmans aparet ankor dan son lizye. Mon may li dan son likou e mon esey konsol li.”

“Edwiz, pa bezwen ki ou plere. Mon ava esey ed ou. Mon boper i kapab rod en pe raspay ki a bon pour tir sa piti.”

“Florans kimannye ou konnen ou boper i kapab rod raspay?”

“Limenm ki dir mwan. Mon ava gete si vre i konn sa ki bon.”

“Florans ekskize, pa fer li rod naryen. Plen dimoun in konnen ki mon pe al ganny piti, e si i arive ki mon touye zot pou konnen ki mon’n bezwen fer lavortman. Mon pa krwar si sa i en solisyon.”

“Edwiz les dimoun dir sa ki zot oule. Me si ou tir problem lo ou ase.”

“Non, sa pa pou tir problem lo mwan. Mon pou zis sorti dan pwalon e tonm dan dife. Tou le de fason mon pou ganny brile, o kontrè dan dife mon pou pli soufer.”

Mon remarke ki Edwiz i annan toutafe rezon. Mwan, person, apar ki sa ners, person ankor pa ti konnen ki mon ti ansent e i ti fasil alors pour mwan tir piti. Ka Edwiz i diferan, bokou dimoun in konnen e alors vre si i touye piti i a kapab dan plis problem. Mon pa ava met plis problem lo li, me mon pou ed li kantmenm dan en lot fason. Mon pa kontan i koumsa. Mon ava rod en lot solisyon e dek ki mon gannye mon a fer li konnen.

Bann zour ki swiv nek mon fer nide menm. Ki swa mon dan lekòl, dan lakour, lo semen, menm dan kabinen, mon fer mon lespri travay menm. Par ler, ler mon tro kalkile, mon latet i lanse e i fermal e panadol i mele pour geri li.

Mon’n fini aret konsantre dan leson. Mon’n obliye si mon devret travay dir dan laklas pour ganny mon promosyon. Sa pour mwan konmela pa enportan. Si mon arive ed Edwiz, sa i pli annan lenportans e mon pou pli kontan. Mon’n deza konn sa soufrans mwan osi. Mon’n dan menm sityasyon e mon konnen ki i fatig latet en kantite. I donn ou lanvi bwar pwazon, sove kot lakour, kriye konmsi ou pe ganny kriz eksetera. Zour i ale an bonnavini e mon pa ankor ganny en fason pour ed Edwiz. Mon ankor pe seye e en zour mon a bezwen trouve. Napa keksoz ki enposib lo later si ou anvi fer sa keksoz. Kantmenm i vin tar, me plito tar ki zanmen. Edwiz i konnen mon pou seye. I konnen mon dan son kote aköz nou’n toultan byen ansanm konman de ser. Menm si i annan de an pli vye ki mwan sa pa vèdir ki mon pa kapab ed li.

Anfen dan en lannwit byen trankil kot tou dimoun pe ronfle sonmey konmsi zot pe redi gro karang en nide i vin dan mon latet. Premye kou, mon pa ganny li tro kler, mon war li konmsi i enposib me deplizanpli i vin pli kler an mezir ki mon fer mon lespri travay plis.

Sa nide i traverse dan mon latet konmsi kouran. Edwiz in dir mwan ki i pa konn sa zonm ki’n vyol li. Mon krwar ki i anvi konn sa kriminel e met en gro pinisyon lo li. Fer li santi en gro douler e menm si fodre lanmor pran li. I en gro problem ki i’n met lo Edwiz e mon krwar ki lanmor menm ki i merite pour son pinisyon.

I annan en bonnonm ki reste O Kap ki i a kapab ed nou ladan. Mon ava aranz tou keksoz avek Edwiz. Mon ava vol larzan manman pour pey sa bonnonm avek. Mon konn tre byen kot manman i met son pers. Demen mon pa ava al lekòl. Mon a mont kot Edwiz e nou ava aranz tou keksoz. Son paran pa pou la, zot tou le de zot travay. Alors nou a fer tou keksoz

kler e si i dakor demen nou ava al kot nou bonnonm. Sa bonnonm pa pou get nou grander. Son metye i sanmenm, pour bann zafer parey e si i ganny son larzan ase. Sa ki vin kot li e demann li pour fer nenport kwa, i pare pour fer. Pour li son larzan ki enportan.

Lizour i fer e mon leve. Mon okip mwan. Mon met mon liniform lekol lo mwan kantmenm mon pa pe zanmen al lekol. Mon sot lo semen e mon anrout pour al kot mon dalon ki bezwen konfor. Ler mon arive, Edwiz pe lir en liv anba en pti pye mang zis dan kwen lakaz. Son vant konmsi in pli gro. Ler i war mwan vini i ferm son liv e i akey mwan ek en sourir. Kantmenm i dan problemm, Edwiz pa obliye pour donn mwan en sourir parey labitid ler nou zwenn.

“Ou’n anmenn bon nide pour mwan?”

“Mon krwar i en bon nide, me ou trouve, i pou toutafe depan lo ou prezan.”

“Ozordi sa ki ou’n anmenn pour mwan, mon pou dakor si zis selman ou pa pe vin dir mwan pour touy piti ...”

“Wi Edwiz, piti pa pou ganny touye, me pou annan dimoun ki pou ganny touye.”

Deswit nou met nou dan nou gran konversasyon ki petet de zennfiy sa laz pa ti devret fer en tel konversasyon. Me les sa, sityasyon lavi i fors nou pour fer li. Premye kou Edwiz pa tro ganny en konpran sa ki mon pe esey dir li, alors mon eksplik li dan en fason pli senp.

“Edwiz nou ava al kot sa bonnonm O Kap e nou a fer li fer de keksoz pour nou. Premyerman, nou a fer li sanz lespri ou papa. Nou a fer li aranz ou papa dan en mannyer ki i ava konpran ki i pa devret bat ou oubyen pous ou. Okontrer sa bonnonm i a fer li aksepte ki vre pa ou ki’n anvi ganny sa vant e alors i a donn ou tou lanmour ek lafeksyon nesaser ki i a fer ou ganny ou baba dan lazwa. Dezyenmman, nou a fer li fer zonm ki’n vyol ou ganny lanmor. I a fer aksidan dan sa menm loto ki i ti anmenn ou ladan pour al vyol ou, e i ava ganny son lanmor.”

“Florans mon pa ti pe zanmen mazine si ou ti pou ganny en nide

parey. Me aköz, olye ki nou al demann lanmor pour sa zonm, aköz nou pa demann sa bonnonm pour fer sa zonm vin isi dan lakour e aksepte pour anmas son pake?”

“Edwiz ase bet. Kimannyer sa zonm pou konnen ki ou reste isi.”

“Florans me pa ou dir mwan ki sa bonnonm i kapab fer tou keksoz, e alors i bezwen kapab fer sa zonm vin isi dan lakour osi. Kimannyer i kapab touy sa zonm ki pli difisil ki i pa pou kapab fer sa zonm vin isi ki paret pli fasil pour fer.”

“Wi, i ava kapab fer sa kriminel vin kot ou paran isi e anmas son batar, me Edwiz ler ou mazin problemm ki ou ladan, difikilte ki i’n met ou ladan, i’n fer ou ledikasyon gate, i’n anmenn vyolans kot ou lakour e alors fodre absoliman en bon pinisyon pour li pey tousala e son pinisyon i lanmor.

“Bon Florans, mon pa ava fer ou ankoler ek mwan. Mon ava aksepte ou nide. Nou a met lanmor lo sa enkoni. Me kan nou pou kapab al kot sa bonnonm?”

“Demen menm. I napa letan pour perdi, e pa bezwen fatig ou lo kote larzan. Mon annan larzan pour pey bonnonm.”

Mon reste en lazournen ek Edwiz e ler mon konnen lekol in large, mon retourn dan lakour.

Lannmen i arive, e mon misouk misouk manman. I pe ale vini dan son lasanm e mwan osi mon byen bezwen antre dan son lasanm ler i pa pe antren mwan. Mon bezwen rod en fason pour mwan antre. Si zis prezan i annan larzan dan son pers, e la si i napa, ki mon pou fer? Edwiz pou esper mwan mon konnen e kimannyer i pou santi li ler mon pou dir li mon pa’n ganny larzan kan yer mon ti dir li mon annan. Alafen mon arive ganny en sans pour antre anndan kot manman, letan ki li i al dan kabinen. Son pers i lanmenm lo en pti latab. Mon pran, mon ouver. Granmersi i nobou annan de trwa biye san roudi ladan. I annan 600. Mon kalkil en kou, mon pran 400 e ferm pers e mon sot deor. Mon pran mon sak leköl e ankor enn fwa, mon fer krwar mon pe al leköl, me sa ler kote ...

Edwiz in ariv lo stenn pe esper mwan. Bis i vini e nou ale. Nou al

fer nou misyon. En misyon ki kapab fer nou bite e menm ganny en gro pese ki menm per pa pou kapab konfese. Me les li, sa ki ava arive, i ava arive, mon bezwen tir Edwiz dan problem. Les li si i en pese grav, mon a ziz dan lesyel ler mon a mor.

Nou ariv kot nou destinasyon e bonnonm in asize devan laport pe vey lo semen. Kekfwa i ape veye lekel ki pou vin anmenn larzan pour li ozordi. Lekel ki pou vin rann li vizit. Kekfwa lontan i pa ankor ganny okenn viziter me tou fason ozordi i a ganny nou. Edwiz i konmans per letan ki bonnonm i fer nou antre. I pa tro anvi antre me mon get li avek en lizye ki fer li antre byen vitman. Apre tou, mon pe fer sa pour li, pa pour mwan.

Bonnonm i annan en gran labarb blan. Son seve osi i gran e napa en sel bren ki ankor nwar. Tou in blan.

Son nennen i enpe pwent e i menm annan gran zong lipye. Edwiz i annan rezon per li, me la pa en letan pour montre lafreier, laper, ni naryen. I en letan pour koz seryezman avek sa bonnonm.

Bonnonm i diriz nou dan en lasanm en pe fernwar. I ariv kot en latab ki annan en bann pti topet lo la, e dan sa bann topet i annan en bann lapay dibwa. I donn nou sakenn en sez e fer nou asiz devan li, lanmenm obor sa latab. Mon remarke ki Edwiz i ankor per e i pe konmans tranble obor mwan, e alors mon pran laparol premye kantmenm mwan osi mon annan en pe lafreier, me pa mwan Florans ki pou montre mon lafreier. Mon a kasyet li anndan. Mon rakont bonnonm sa zistwar e i ekout atantivman. Ler mon fini, bonnonm i get mwan e fer en pti sourir. I kalkil en kou. I grat latet. I get tou sa bann pti topet devan li lo latab, son de lapo lalev i bouze me okenn parol pa sorti. Apre bonnonm i leve e i antre dan en lot lasanm. Ler i retournen i vin ek en papye ek bolpenn. I ekri lo sa papye e kantmenm mon lizye i lo sa ki i pe ekri, mon pa kapab konpran naryen. Son lekritir i pli move ki lekritir dokter.

“Bon zanfan, zot demann i ava ganny akonpli byento. Mon a

konmans travay lo la ozordi menm e zot a trouv rezilta byento. Annan konfyans dan mwan, aköz mon vremen kapab fer sa ki zot dezire.”

Parol sa bonnonm i fer mwan kontan. Mon ti per pangar i ti a dir ki i pa pou kapab fer sa pour nou. Prezan parey i’n dir, mon ava annan en vre konfyans dan li ki mon pa’n deza annan dan okenn dimoun avan, kekfwa mon ti annan dan mon papa, e petet mon’n obliye. Bonnonm i demann nou 300 rounpi e mon donn li. Sa lot 100 rounpi mon larg avek Edwiz. Mwan, mon pa bezwen. Deplis, mon pa pou kit larzan vole avek mwan. Prezan nou ava espere. Mon annan pasyans e mon konnen ki Edwiz osi i annan sa pasyans e alors nou tou le de nou a esper nou rev vin en realite.

SAPIT 6

Menm zour ki manman i konmans plenmy larzan manke, mon anmas en portmonnen dan kwen rigol. Mon sorti aste pwason bazar e konman ozordi i lafen dimwan, bann peser pe rod zot kouraz perdi. Zot pe vann pwason en pe pli ser ki labitid. En bonit ki zot abitye vann 20 rounpi, ozordi in ariv 25 ou 30 rounpi, en pti ronden karang 15 rounpi ozordi zot pe vann 20 rounpi. Bann pake pwason lekay osi zot in fer mont pri. Me tousala i normal. Bann peser osi zot bezwen kontan ler lafen dimwan in arive. Zot bezwen ganny zot biye e fodre pa ensilte zot pour zot kouraz. Zot metye i koumsa e zot en travayer zot osi e zot bezwen larzan pour noury zot fanmiy.

Mon monte avek en bon pake kordonnyen ki'n kout mwan 20 rounpi. Mon pe mazin en bon bouyon blan ki nou a kapab fer avek dan lakour ler mon war sa lobze dan kwen rigol. Mon koste pli pros e a mon lazwa, mon war ki i en portmonnen ankor byen nef. Avan mon bese pour mwan anmase, mon get otour mwan si napa personn ki pe get mwan. Mon get devan mwan, deryer mwan, kote drwat, kote gos, partou partou ziska ler mon satisfè ki tou dimoun dan larout i okipe zis avek zot lokipasyon, alors mon bese e mon anmas sa portmonnen. Mon ouver e mon war 2,500 rounpi. I napa ankor naryen ladan. I napa okenn lidantite. Mon fer en sel nide, mon pran tou sa bann larzan e mon anvoy sa portmonnen vid dan bwa. Mon'n ganny mon sans e alors mon pa kapab les li perdi. Mon pa pou abord ni manman ni Misel lo sa size. Mon pou selman pran 400 rounpi e remet dan sa pers ki mon ti touse lot zour. Manman in konmans plenmy son larzan manke e i a ganny en sok ler i ava war son larzan in retournen dan son pers. Larestan larzan, anba anba, mon a gete ki mon a kapab fer avek. Mon a donn en pe Edwiz pour rod en pe son bann nesaser maternite. Byento mon krwar i a bezwen al delivre piti. I dan son wit mwan e alors pa mank li bokou letan.

Depi sa de trwa Sanmdi mon pe donn li kou-d-men pour koud napi.

Koud mon'n konnen depi ler mon ti ankou vreman pti. Tou le swar, manman ti montre mwan konman pour fofile, konman pour rakomode, konman pour taye e menm pyeste. Mon ti aprann tousala avek en vre lanmour. Ozordi i ape konmans ed mwan. Sa ki nou aprann pandan nou lanfans i ed nou dan nou zenntan.

Nou bonnonm sepannan pa ankou fer naryen pour nou. Mon pa ankou war okenn sanzman. Dan lakour kot Edwiz i ankou dan menm leta. Son papa in foulkan, i'n ale. Personm pa konnen kote. I pa'n kontan ki Edwiz i reste la kot li avek en vant e a sak fwa ki i'n oule pous Edwiz, manman Edwiz in mel ladan. Li, dan son pe krwar kekfw a i pe esey fer bon rezon avek son mari saler i pe fer sityasyon vin pli pir. Kalot son mari i rezonnen dan son figir e i bezwen zis siporte. Semenn pase apre ki son mari ti tap li, i ti anmas en sopin ater e i ti fer kraze lo fron son mari. Sopin ti koup son mari lo fron e i ti bezwen al panse. Ler i ti retournen, i ti anmas tou son bann bataklan e i'n foulkan san ki personm i konnen kote i ete prezan. Edwiz kantmenm son papa in kit lakour akou li, i toultan dir mwan ki i ankou kontan son papa en kantite e ki i anvi ki i retourn kot lakour. Edwiz i byen enkyet e i sagren bokou. I menm dir mwan ki plito i ti a'n aksepte ler mon ti dir li tir piti avek feyaz. Mwan mon zis la konman son konsolater. Mon donn li lespwar, mon donn li konfor kot i merite, me mon annan en lakoler mwan osi. Mon ankoler ler mon mazin sa 300 rounpi ki mon ti donn sa bonnonm pour li ed nou, me nou pa war okenn rezilta ziska prezan. Papa Edwiz pa'n zanmen sanze me okontrer en kitans in arive. Napa okenn zonn osi ki'n mor dan okenn aksidan parey mon ti dir li fer e ki i ti promet i pou fer sa byento. Me mon pa ankou war naryen. Mon'n al donn mon larzan pour naryen. Me les li, apre tou, mon pa ti rente pour mwan ganny sa larzan. I ti en larzan vole.

Edwiz i antre maternite en zour Mardi swar. Depi lizour nek i ti pe plenny vant fermal. Nou ti selman nou de kot lakour e mon'n donn li lanmen prepar li. Mon'n al telefonn lanbilans, lanbilans in vini e Edwiz in ale. Ankou dan de trwa zour kekfw a i sorti e mon pe priye pour li pa

ganny tro bokou problemm laba. Apre tou, li osi i ankou en zanfan e i pe vin en manman.

Ozordi mon lanniverser e mon leve avek en ta nide dan mon latet. Trez an depi mon lo later, trez an depi mon pe debat. En ta problemm pe kontinyen antour mwan. Problem ki zanmen mon ti pe mazin si mon ti pou gannye sa laz. En bann problem ki mon konnen si mon papa ti ankou isi kot lakour, zanmen mon ti pou gannye. Okontrer mon konnen si i ti la ansanm avek mwan, mon ti pou annan en vre lazwa pour mwan viv. Mon konnen i ti ava pe donn mwan en vre lanmour, en vre lafeksyon e endik mwan konman pour viv pour mwan toultan dan lazwa. Wi, si mon papa, sa vre zonn ti ankou avek manman en bann problemm avek mwan ki'n arive, mon konnen pa ti pou'n arive. Mon pa ti a'n ansent e bwar lekors pou tir piti, mon pa ti a'n degrade dan mon lesan pou desann dan C. Si tousala in ariv mwan sa laz ki mon annan, mon pou toultan dir gras a Misel. Li ki pa pe fer mwan viv dan lazwa, li ki pe fer mwan degout mon lavi e menm degout mon maman akou i'n al rod li kan zot ti vreman pe viv byen dan zot lavi maryaz zot de papa. Me non, li manman in prefere viv dan lavi menaz avek sa loulou, sa foutre dezord ki oule mwan osi galan avek li. Si mon ti konnen keksoz ti pou parey, plito mon ti a'n al avek papa lo zil kantmenm mon ti ankou annan selman 7 an. Mon plis ki sir ki li papa lo zil i byen, i zwaye, i pa pe ganny tro bokou problemm. Mwan Florans, mon vreman anvi viv ankou avek sa papa. Mon anvi war li, mon ankou anvi son lafeksyon, son sourir, son lanmour ki mon ti ape gannye letan i ti ankou isi dan lakour. Papa oli ou, mon pe kriy ou, kot ou ete, ekout mon lavwa.

Ekout lavwa ou sel zanfan ki ankou kontan ou e ki pe reve pour viv avek ou ankou. Papa, mwan Florans ki pe kriy ou, fotespere ou ankou mazin mwan parey mon mazin ou.

Ozordi mon ganny trez an. Trez an depi ki ou'n met mwan lo later. Mazin trez an pase mon papa, ler mon konnen ou'n pran mwan dan ou gran lebra e bers mwan letan ki manman ti pe fer mon bwar. Papa pa les

mwan mazin tousala, akòz mon larm i konmans koule lo mon lazou. Mon ava eswi y mon larm e mon a pran lespwar, en zour mon konnen nou pou viv ankor ansanm e mon a reganny sa vre lazwa ki mon'n nepli annan depi ki ou ti kit lakour letan mon ti ankor annan set an.

An sortan lekol ozordi, mon pa ankor ni menm tir sa liniform lekol lo mwan, manman i donn mwan en nouvel ki fer mwan ganny en sok.

“Florans mon piti, ou'n tann maler ou papa?”

“Papa! Me non akòz, i'n ariv li maler lo zil kot i ete?”

“Sa ki dir ou ki papa i lo zil? Ou papa depi en bon pe letan i isi Mae, e apremidi dan mon pe drese mon tann lanons son lanmor lo radyo.”

Son lanmor! Manman pa dir sa.

“Florans si ou papa pa ti'n mor, mon pa ti a kapab met lanmor lo li.”

“Me ki i'n gannyen pour li mor. I ti malad?”

“Dan nouvel midi in dir ki i ti avek en lot zonm dan loto e zot in fer aksidan Lans O Pen. Loto in al anba miray e li in kas likou. Sa lot zonm pa ankor mor me dokter pa kont lo li.”

“Manman ou a dir mwan pa mwan ki'n al”

“Pa ou ki'n al kwa mon piti?”

“Non, naryen manman, lese.”

Mon sorti deor a so-d-larm. Mon apiy deor dan kwen lakaz e mon kriye. Mon annan en sel nide dan mon latet.

Mon pe demann mon lekor si kekfw pa ti papa ki ti vyol Edwiz e la in ganny son pinisyon ki nou ti demande, oubyen eski pa ti li? Me i pa fasil ditou pour mwan krwar si ti papa menm ki'n vyol Edwiz. I pa ti zanmen sa kalite dimoun e de plis i ti konn Edwiz tre byen, e mon pa krwar si i'n kapab fer sa avek Edwiz. Non, petet papa in mor son bon mor menm. Maler pa averti, en aksidan in arive e i'n defen. Mon a tire dan mon latet ki ti li ki ti fer sa vilen soz. Me si plitar mon dekouver ki ti limenm ki'n vyol Edwiz, mon krwar i ava annan keksoz ki a pase isi dan lakour avek mwan.

Nou les Misel retourn lakour sorti travay e nou kit Mervin avek li. Nou de manman nou al Kaskad kot Ton Feliks kot lekor papa pe ekspeze. Laba bann ki ti fidel avek papa, in arive pou rann li dernyen omaz. Mwan konman mon arive, mon antre anndan avek manman e nou al kot serkey. En kote lizye mon papa i ankor ouver e bokou dimoun pe esey ferm sa lizye, me mon papa i fer sek avek sa lizye, i pa ferm ditou, manman i vini li osi e eseye, lizye pa fermen menm. Dernyen kou mwan menm mon al eseye. Mon pran mon ledwa mon pas selman en sel kou lo lizye papa e lizye i fermen. I kler ki papa ti oule mwan, son sel piti pour ferm son lizye. Deor bann grannwar setaki pe fer en keksoz. En bann pe zwe domino, en bann zot dan kart, bann pli aze menm pe rakont zistwar lontan. Kot i gou sa ki riye i riye me mwan kot mon'n debout lanmenm obor zot, mon pa war naryen ki gou pour mwan riye. Apre tou osi, mon realize ki mon kot lekor mon papa e napa person ki pou kapab fer mwan riye.

I ariv en moman kot tou dimoun i deor e napa person kot serkey. Alors mon profite pour antre anndan e fer en lapriyer obor serkey mon papa. Apre sa lapriyer, mon get mon papa pour apepre en minit san dir naryen. De gro larm i sape dan mon lizye e tonm zis lo son fron.

Dan mon lizye konmsi mon pe war ki son labous pe bouze. Konmsi i anvi koz avek mwan e zis selman ki i'n defen e i pa pou zanmen kapab dir mwan sa ki petet i ti anvi dir mwan fer ozordi kot ou lekor mon papa, mon annan ankor plis keksoz pour dir ou. Mon espere ki pa ti ou ki ti vyol Edwiz akòz si ou ki'n fer li, alors mon papa, mon a kapab dir ou ki si ou'n ariv dan ou sis plans ozordi, i mon lafot, me si pa ou ki'n vyol Edwiz, alors ou'n mor ou bon mor. Me selman papa kantmenm ou pa ti ape viv avek mwan, i pa ti ankor ler pour ou mor, prezan mon'n perdi tou lespwar pour nou viv ankor ansanm. Eksa papa, ou ganny ou lanmor menm dat ki zot ti met mwan lo later zot de manman. Mon'n perdi ou byen zenn e sa i vreman fer mwan soufer. Depi ou depar dan lakour, zis problem ki pe antour mwan. Tou sa bann problem pe ganny koze par sa bebet ki ti met pwazon

dan zot lavi maryaz zot de manman. Papa i annan problem ki mon annan me mon pa kapab dir ditou manman akòz mon napa sa kouraz. Mon per, mon kanmi pou dir li tou sa problem. Avek ou mon papa kantmenm ou'n mor, mon a kapab dir ou tou sa problem. Mon pli kapab koz avek ou ki avek manman. Wi, papa, sa bebet i oule ki prezan mon vin son fanm san realize ki mon annan selman trez an e li karannsenk an. Lot zour mon ti'n ansent pou li e i'n fer mwan bwar en lekors ki mon pa konnen avek ki dibwa i sorti, e mon'n touy piti. Sansan sa letan, mon ti'n fini vin en manman. Manman li osi mon krwar i'n nepli kontan mwan parey avan e mon ti pe touzour reve pou mwan vin reste kot ou en zour me la ozordi ou'n defen. Me prezan si i annan en posibilite vin sers mwan e anmenn mwan avek ou e si ou kapab konmela menm la e ki demen nou ava pe anter ansanm, wi papa vin ... Mon pa ankò fini koze e mon santi mon lekò redi. Mon tonm lanmenm ater e ankò en kriz i pran mwan. En pti moman dimoun in antour mwan. Zot pas flerdoranz dan mon figir. Mon fini par trouve ki papa pe pran mwan menm. Mon war lanmor dan mon lizye.

Mon santi en dimoun ki lev mwan anler e anmenn mwan lo en lili. Mon kriye ankò en kou for e apre mon perdi konnesans.

Ler mon reveye bomaten laplipar dimoun ki ti la yer swar in ale. Mon osi aprann avek Ton Feliks ki manman in retourn dan lakour depi granmaten e i pe vin selman pou lanterman. Apremidi dimoun i konmans ranpli lakour ankò. Avan serkey i fermen mon anbras papa de trwa fwa lo son fron. Larm i marse dan mon lizye, mon esey pran kouraz. Ler manman i pase pou dir dernyen orevwar papa, mon war li lev sa dra ki pe kouver papa e i met en pti lobze dan serkey, apre i aranz sa dra byen parey i ti ete. I pa trouve si mon pe get li. Ler i sorti deor, mon antre deswit e mon al gete ki i'n met dan sa serkey. Mon lev sa dra enpe anler e mon war son bag lalyans ki papa ti met dan son ledwa zour zot maryaz. Ozordi i met sa bag dan serkey papa pou papa anter avek. Mon pa dir person naryen. Petet ler ou annan lalyans ki en dimoun in donn ou, si sa dimoun i mor, ou met

sa bag avek li. Petet koumsanmenm i ete mon pa konnen. Parey mon'n deza dir, i annan keksoz ki mon pa ankò ganny eksplike lo la e mon pa ava les zot fatig mon latet.

Lekò papa i pas legliz. Per i beni, i dir enn de pti parol e apre nou anmenn lekò dan simityer Mon Fleri. Pandan ki serkey pe desann dan trou, mon mank tonm dan trou mwan osi. Mon pa kapab kontrol mon lekò ditou e si Ton Feliks pa tyonbo mwan atan mon ti pou ariv dan trou avek serkey. Mon krwar ti a bon menm pou mwan, mon ti ava anter ansanm avek papa menm si mon ankò vivan.

Anfen mon papa in ale, i'n fini. Kekfwa i'n war son semen pou leternite. Mon pe priye pou bondye aksepte li dan son paradi akòz papa kantmenm i pa ti pe reste dan lakour, i pa ti en move dimoun. Me selman si li ki'n fer sa aksyon avek Edwiz mon krwar Bondye i a pini li me mon pa ankò krwar ditou e i difisil pou mwan krwar osi si li ki'n vyol Edwiz. Pa dir mwan mon'n al touy mon papa akòz mon konnen i pou en pese grav.

Non, papa in mor son bon mor, pa li ki'n komet sa lofans. Apre osi sa bonnonm pa'n kapab aranz papa Edwiz ditou, e okontrer i vin pli feros menm ziska en separasyon in arive. Si alors i pa'n kapab fer naryen avek papa Edwiz, mon krwar i pa'n kapab osi touy person, akòz sa i pli difisil. Papa in mor son bon mor e sa bann bonnonm zot zis en bann bater latet. Zot pa kapab fer naryen e se nou ki krwar zot kapab fer keksoz.

SAPIT 7

Pti-a-pti, mon aret mazin mon papa. Mon'n pran kouraz e mon'n konsole. Mon'n realize ki kantmenm si mon a kontinyen plere, i pa pou leve. I pa Zezi Kri pour li resisite.

Edwiz alors ti'n fer en fiy. Nou'n desann en zour Dimans e nou'n al batiz li. Apre batenm Edwiz in vin dan lakour e nou'n pran enn de pti limonnad ek gato nou'n servi. Mon'n aste de trwa met latwal nwar pour koud mon bann rob dey. Manman i rode kote mon ganny larzan pour aste tousala e parey labitid mon annan en lalang pour donn li. I ti'n menm konmans akiz mwan ki se mwan menm ki'n vol son larzan, me ler mon ti remet sa 400 roupi dan son pers, i ti vin demann mwan pardon pour akiz mwan.

“Pardon Florans, mon'n trouve mon larzan. Mon'n akiz ou pour naryen.”

Mon ti aksepte son pardon kantmenm mon konnen i ti annan toutafe rezon pour akiz mwan e menm fer mwan gout de trwa kou-d-roten si i ti anvi akoz ti mwan menm ki ti pran son larzan.

Edwiz a son tour in byen pase avek mon larzan. I'n ganny pour li aste rob-de-sanm, de trwa souksen, en pe napi laboutik e menm en gro bwat lapoud pour piti. Tousala ti kout larzan me mon ti annan pour siport sa bann pri.

La aprezan tou le Dimans mon al lanmes dan rob dey. Manman li kantmenm papa in mor toultan i dan son bann rob kouler. Misel i demann li ki i santi pour papa pour li met rob dey. Manman pa dir li naryen e i aksepte. Me mwan Florans, si sa Misel i vin dir mwan en keksoz parey, larepons ki mon pou rann li mon krwar sanmenm sa zour ki zot pou pous mwan dan lakour kantmenm lakaz i pour mon papa.

Li sa boper i pa realize ki li osi en zour i pou bezwen mor. Lanmor papa i en tre gran lafet pour li e i fer manman fet ansanm avek li.

Manman li osi a son tour pa reflesir naryen. Petet apre zot kitans, i'n met papa konman dernyen dimoun lo later, e Misel, sa loulou, sa zonn brit, sovaz, i'n met li premye dan son leker. Misel i son leker dou, i son seri koko. Me tansyon ou mon manman, mazin demen, get en pe dan nou lavenir. Si ou pa konn naryen, demann mwan mon a dir ou e ou a zis debout labous ouver mannyer ou pour sezi.

Dan lekol legzanmen pe al konmans ankor, me sa voyaz mon tanpi tou keksoz. Si mon mal fer ankor, si mon reste lanmenm dan C pa fer naryen. Lekol nepli enportan pour mwan. I'n nepli annan sa valer pour mwan. Manman menm nepli fou nennan dan mon letid parey lontan. I'n nepli demann mwan konman mon pe pase lekol. I'n obliye si mon pe lekol e i'n menm obliy son bann parol lankourazman ki i'n deza dir mwan. Mwan Florans sepandan, mon pa war sa vre sans akòz mon pe kontinyen lekol. Mon anvi kite. Ek tou sa problem, traka, depresyon pour mwan kimannyer mon a kapab fer byen lekol parey lontan. Mon'n fini menm trouve ki mon pa pou zanmen annan en bon lavenir parey lontan mon ti pe mazin mon pou annan. Lontan mon ti pe war mon lavenir an roz, me la konmela mon pa kapab dekri sa lavenir ki mon pe trouve devan mwan. Me petet parey mon'n dir papa fer, i ava fer. Mon pe zis esper li pour li vin sers mwan. Mon menm napa okenn sans mon pe viv e alors mon a kontinyen esper sa zour ler i ava vin pran mwan.

Depi avan yer manman in bezwen al vey bann piti son ser ki reste Lans Etwal. Son ser Pti Fiy in ganny admet lopital avek en asma byen danzere. Sa asma in may li depi byen lontan e i pa oule kit li ditou. Par ler i pa santi li, me ler i frap li en kou i frap li tro bokou. La sa voyaz in telman frap li ki menm dokter pa tro kont lo li. Tantin Pti Fiy napa okenn msye. Son mari marye in mor e i pa'n enteres li pour rod ankor zonn kantmenm i ase zenn e son lekor i ankor byen fre.

Son mari marye in kit li deryer avek kat piti, de fiy ek de garson. Zourdann i pli vye e i annan li kenz an. Me menm sa laz ki Zourdann i annan, manman i santi ki Zourdann pa pou kapab vey son pti frer ek pti ser

e alors manman in al ed zot. Isi deryer, i'n kit Misel avek nou me yer swar avek labsans manman, Misel ti fer mwan araze ki mon ti bezwen zour li en kou.

"Florans dir mwan, eski vreman ou pa anvi mwan pour vin ou msye? Oubyen ou anvi me selman ou pa tro konpran mwan byen?" Ler i ti poz mwan sa keston, mon ti selman lev mon de kannet lizye e get li. I ti leve kot i ti'n asize obor mwan e i ti antre dan lasanm e ler i ti retourn kot mwan, mon ti remark en keksoz ki i ti pe anmennen dan son lanmen.

"En, mon konnen ou pa pou reponn mwan sa keston, me pran sa pour ou."

"Kwa! Kisa ki ou pe donn mwan."

"Florans sa i en bann pilil. Ou a pran, ou a bwar."

"Me Ton Misel ou fou. Akfer fodre mon bwar pilil kan mon pa malad. Kisa ou anvi touy mwan?"

"Non Florans sa bann pilil i napa naryen pour fer avek maladi. Pa fodre ou malad pour ou bwar sa bann pilil."

"Me akfer fodre mon bwar alors? Ki son lenportans?"

"Sa bann pilil pour protez ou Florans."

"Protez mwan? Ki sa pilil ki kapab donn mwan proteksyon?"

"Florans mon a eksplik ou. Ou rapel lot zour ler sa pti lensidan ti arive avek ou? Alors si ou bwar sa bann pilil ou pa pou zanmen ansent ankor."

"Mon konnen prezan lekol sa bann pilil ki ou'n anmennen pour mwan. Me akfer fodre mon bwar sa bann pilil kan mon pa pe sorti avek person."

"Mon dakor Florans, me ou annan trez an prezan e alors fer ou lespri travay. Ou'n enpli en pti zannan e alors mon pa devret dir ou akòz ki mon pe donn ou sa bann pilil. Ou konnen ou menm."

"Wi, mon konnen prezan, me eskiz mwan. Konman mon pe ale pour leve obor li, i ti tyonbo en kote mon lanmen pour anpes mwan ale."

Avek mon lot lanmen lib, mon ti atrap en pti lata e fer rezonnen lo son fron. I ti larg mon lanmen vitman.”

“Florans me pran ou pilil. Akfer ki ou’n fer mwan gaspiy larzan aste?”

“Eski mon’n deza dir ou aste pilil pour mwan? Si ou pa konnen prezan ki ou pou fer avek sa bann pilil, pran bour avek ...” Mon pa ti fini dir li sa ki mon ti pe al dir li. Mon ti antre dan mon lasanm e tak laport. I ti plenny avek mwan pour ouver pour li nobou antre kot mwan. La prezan mon ti bezwen zour li en kou. Sa ki ti sap dan mon labous i pa gou pour mwan repete, me selman i ti ganny ase. I ti bezwen al dormi kot i devret dormi dan son lasanm.

Aprè tou sa letan, mon konnen i anvi rekonmans son bann vilen manni ankor. Toultan, mon krwar i veye ler manman pa dan lakour pour li fer sa. Pandan labsans manman i panse ki i kapab fer tou keksoz parey i anvi. Mwan Florans, mon pa ti pe mazin ditou si i ti pou fer sa ankor apre tou sa letan ki i’n reste trankil. Si mon ti konnen ti pou koumsa ankor, yer swar mon pa ti pou asiz obor li ek nide ki nou a koz koze ziska sonmey i a vin vol nou. Si mon ti konnen i oule al pli lwen, al pli profon, mon ti pou’n tonm dan mon plas byen boner. Sa voyaz i vin avek pilil kontraseptiv pour mwan. Si mon ti pran sa bann pilil mon konnen ki ti pou’n arive yer swar menm. I ti’n fit son krok me mon ti remark sa deswit.

Aprè sa zoure ki mon ti zour li, mon ti bezwen pasyante pour mwan kapab ganny sonmey yer swar. En nwit antye mon pa’n kapab tir mon lespri ladan. Mon’n menm tranble parey en fey dibwa dan divan, lo mon lili yer swar. Mon pa konnen si ti akòz lafreser ki mon’n tranble oubyen si ti akòz sa ki ti’n pase.

Bomaten mon’n leve e mon’n napa sa kouraz pour al lekòl. Pourtan ozordi, legzanmen pe konmanse. Manman ti’n dir mwan anmenn Mervin kot Madanm Lanklim letan mon al lekòl. Madanm Lanklim i pare pour li vey Mervin, me mwan mon’n war ki mon pa pou kapab al lekòl ozordi e alors mon’n reste dan lakour nou de Mervin. Ozordi mon ti pou al kas

latet, me i fer byen ki mon pa’n ale. Les li kantmenm mon a mank sa trwa legzanmen ki i annan ozordi. Mon letid nepli enportan pour mwan. Apre tou, mon pa anvi pas parey enn fwa ler mon ti pe fer legzanmen ki mon pa ti kapab konsantre ditou. Mon ti reponn selman 5 kestyon dan Angle. Ozordi zafer ti pou parey e manke pli pir ankor. Mon pa ava mont dan A ankor, mon a reste dan C pa fer naryen. I reste de an pour mwan fini lekòl primer me mon pa asire si mon pou ankor lo later avan sa de an i fini. Pour lemoman, avek tou sa problemm i annan en nide ki pe brouye dan mon latet. Sa nide mon ti gannye yer swar menm ler mon ti ape vire devire lo lili pour ganny sonmey. Sa i en nide ki mon bezwen esper ankor en pe letan pour mwan gete si fodre mon fer li oubyen non. Sa nide ki mon pe koz lo la i en nide pour mwan bwar pwazon e ki enn fwa pour tou mon a fini lo sa later, mon a fini ek tou sa problemm. Petet sa i en solisyon pour mon problemm, me pour lemoman mon a esey tenir ankor en pe. Mon war ki papa pa pou vin sers mwan e alors mon a fer mon prop fason pour mwan defen. Mon ankor annan en pe kouraz pour espere e ler mon a santi ki mon boubou pe vin pli fermal, la mon pou pran sa pti gerizon.

Nou vir vire nou de Mervin dan lakour ozordi. Napa naryen pour mwan fer pour mwan kapab aret mazin sa nide pwazon. Mon sey zwe lanmizik me i pa fer mwan dibyen. Nide i toultan reste. En kou an gran mon mazine ki papa fek mor e alors mon al tenny lanmizik. Aswar Misel i koste lakour sorti travay byen sou. Konman i antre dan lakour, mon antre dan mon lasanm e parey yer swar mon tak laport. Mon kit li avek Mervin.

I’n ofer mwan en sopin labyer, me plito mon pa dir li naryen.

Mervin pe agas mwan pour ouver laport. Ler mon pa ouver, i fer lasasen, i pile, i tap son pti lanmen lo laport. Mon bezwen al ouver, me maler, mon boper ti pe maske lanmenm dan kwen laport e konman mon ouver laport, olye Mervin antre, li ki antre. I tyonbo mwan e lev mwan anler. I larg mwan lo lili e mon pa konnen kot mon’n ganny sa lafors ozordi pour nobou tap li talon e i tonm ater tou son longer. Mon leve pour

mwan talonn li dan son vant me avan mon tap li, i forse demann mwan pardon e mon pa talonn li. Mon donn li sans. I leve e i al dan son lasanm. Plitar i sorti byen sanze e i dir avek Mervin ki i pe ale me taler i a retournen. I bon menm si i ale, i a donn mwan en lape. I pa'n reisi fer sa ki i ti anvi avek mwan e petet i pe al rod son manze pli lwen.

Mon sirprann ler Misel i retournen plitar. I vin avek en fanm ki mon pa konnen lekel li. I pa en dimoun isi Lans Rwayal. I en dimoun lwen. Mon debout labous ouver e get sa fanm ler i antre dan lakaz lanmen dan likou kanmarad zot de sa bebet. I al plak son deryer dan pli bon sofa. Laraz i mars dan mon leker. Mon anvi fer sa fanm sov maron, mon anvi zour li, ensi ki Misel tou. Sa lakaz pour papa, i pa pour Misel. Manman pa la, kimannyer li prezan i i kapab anmenn galan la? I napa okenn laont ni respe pour mwan. Non, mon a reste trankil. I bon pour manman. I a pas parey i ti fer avek papa ... Ale anmize Misel! Si ou pa pe anmiz ek mwan ase. Mon kit le de zans dan salon e mon tonm dan mon plas. Me byensir mon pa dormi, mon ekout tou zot demaraz. Misel i donn li manze e i manz lanmenm dan salon kantmenm i annan en pti lasal-a-manze dan lakour. Zot koze, mon tann zot anbrase e apre zot antre dan lasanm.

Bomaten ler mon leve ni Misel, ni sa fanm pa la. Mon pa konnen si zot in al depi yer swar menm oubyen si depi granmaten.

Me mwan pandan lannwit mon'n fer mon nide. Mon pou bezwen dir manman sa pti nouvel dek ki i pou retourn dan lakour. I pa en keksoz pour mwan kasyet e mon pou annan bokou kouraz pour rakont mon manman sa. Tanpi si i ariv diskisyon antre zot, me mon pou bezwen pens manman lo sa size.

Tou le swar prezan Misel i vin avek sa fanm. I pa koz ek mwan ditou. I zis selman koz ek Mervin. Mwan osi, pa mwan ki pou al flat li. Mon pe esper selman retour manman. Yer i ti telefonn mwan e i'n dir mwan ki tantin Pti Fiy kantmenm dokter pa ti kont lo li, i'n byen e i'n sorti lopital depi avan yer. Manman in osi dir mwan ki byento i pou retournen

me i pa'n dir mwan ki zour. Me mon pe priye pour li vin en zour ler sa fanm i la e mon a gete ki pou pase. Misel osi prezan pa fer mwan fer enn son louvraz. Son lenz sal sa fanm i al avek, i al lave e i menm drese. I bon menm pour mwan. I tir en fardo lo mwan me i pa pour byen pour manman ler i pou konn tousala. Kantmenm manman in dir mwan ki i pros pour vini, mon pa'n dir ditou. Mon a les li ganny sok ler i a war manman traverse.

Manman i retourn lakour en zour Sanmdi. Misel ti lanmenm. I pa travay dan Sanmdi e sa fanm pa ti la. Manman in mal vini me tou fason i pou bezwen konnen. Misel ti ganny en sok ler manman ti vini.

"Me Titin, ou ti ape vin ozordi."

"Misel pa demann mwan sa, ou oule dir mwan Florans pa'n dir ou naryen?"

"Florans pa'n dir mwan naryen li."

"Me Florans aköz, pa mon ti dir ou fer Misel konnen?"

"Manman i pa koz avek mwan e alors mwan osi mon pa dir li naryen."

"I pa koz ek ou kwa, ou annan en bon pti granzar ek ou konmela depi ki ou papa in mor. Ou krwar dimoun ki'n touy li."

"Mon ti krwar zis mwan ki remarke ki Florans i granzar. Alors ou osi Titin ou'n remark sa. Mon pa reponn sa de zans en mo. Mon les zot trankil. Ozordi manman i ganny pour dir mwan ki mon granzar, pa fer naryen. Ennler fodre ou granzar dan lavi pour konn keksoz. Mon kit zot trankil anndan e mon sorti deor. Mon vin asize dan lari e mon get laba lo lanmer.

Kantmenm manman in dir mwan ki mon granzar mon pa ankore perdi okenn kouraz pour dir li sa ki mon annan pour dir. Mon pa konnen prezan si i pou krwar mwan. Mon pa pou dir li devan Misel. Mon a kriy li akote, mon a koz ek li. Mon a detay byen tou avek li. Tou pti lenformasyon mon a fer li konnen. Si Mervin ti konn keksoz ki pe pase, li osi i ti pou nobou dir. Me malerezman son pti lespri i ankore tro feb. Pov pti inosan i

pa konpran naryen. I'n menm asiz dan lebra sa fanm en zour swar e fanmla in bers li. Pov Mervin i ti krwar i ti pe ganny en vre lafeksyon. I'n kontan, i'n santi li zwaye.

Lannwit i arive me mon pa ankor ganny sa sans pour koz ek manman. Kot i ale, Misel i deryer li. Konmsi i konnen si mon war manman litousel, mon pou rakont manman son forfe ki i'n fer. Mon menm remarke ki i pa pe fye mwan. I get mwan anba lapo lizye. Mon war lafreyer lo son figir. Si i ti fye koz avek mwan, lontan mon konnen i ti a'n vin dir mwan pour reste trankil e pa dir manman naryen.

Ozordi swar nou al get televizyon kot nou vwazen madanm Lanklim. Manman i vin asiz obor mwan, me dek ki li Misel i war manman obor mwan i leve kot li i ti'n asize e vin asiz dan milye nou. I separ mwan avek manman. Mon fer en pti riye e mon konnen ki zis li ki konnen akòz mon pe riye.

Dimans bomaten ler mon pe monte sorti lanmes mon zwenn Misel pe desann. Mon anfor si mon lepa an montan. Mon ariv kot lakour byen fatige. Gro transpirasyon pe koule lo mwan. Menm mon lalang in sorti deor parey en lisyen fatige.

Manman pe okipe dan lakwizin. Mon santi sa bon loder kari poul ki sorti dan lakwizin.

"Manman i annan en keksoz ki depi yer mon'n anv i dir ou me mon pa'n ganny sa sans e la ozordi konman Ton Misel pa la mon a bezwen fer ou konnen."

"Fer mwan konn kwa."

"Manman si ou konnen sa ki Ton Misel in fer pandan ou lab'sans, mon plis ki sir zot pou separe."

"Ou Florans yer mon'n fek dir ou ki ou granzar. Ou anv i fer mwan kite avek mon mari. Sanmenm sa ki ou pe reve."

"Manman konpran mwan byen. Pa kriy avek mwan. Mon pa ankor dir ou kite avek Ton Misel. Mon'n zis dir ou ki si ou konn sa ki i'n fer, ou pou kapab kite avek li."

"Ki mon mari in fer. I'n fer krim?"

"Non, i pa'n fer krim. Me sa ki i'n fer, i plis ki krim."

"Me dir mwan ki i'n fer. Si pa vre sa ki ou pe al dir mwan, prepar ou lapo deryer tande?"

"Wi mon a prepare akòz mon konnen ou pa pou servi li. Sa ki mon pou dir ou i vre. Si Mervin ti kapab konpran keksoz, li osi i ti pou dir ou, me malerezman ..."

"La ki ou pe nonm Mervin. Degaze dir mwan. Mon annan mon marmit pour veye lo dife."

"Manman, eski ou konnen ki Ton Misel ti anmenn fanm la preski tou le swar?"

"Fanm? Kisa, son ser son fanm?"

"Manman sa pa son ser. Ki son ser pou vin fer aswar kot li."

"Florans, Misel in dir mwan ki ou pa'n lev boner dan bomaten pour met boulwar lo dife pour li nobou ganny en pti morso dite avan i al travay. I dir mwan ki i pa'n kapab fors ou pour fer sa pour li e alors i'n fer son ser vin reste isi e dan bomaten i'n okip dite pour Misel gannye."

"Manman eski ou krwar sa?"

"Absoliman mon krwar. Mon bezwen krwar mon mari. Kisa ou krwar kantmenm ou mon piti mon pou krwar ou? Me ou tronpe."

"Manman kan ki i ti dir ou sa?"

"I'n dir mwan sa bomaten ler ou ti'n al lanmes. I dir mwan ki i pa'n anv i dir mwan sa devan ou. La bomaten i'n al anmenn larzan pour pey son ser apre sa pti louveraz."

"Ankor enn fwa mon manman, pa kriy avek mwan, dir mwan, eski ou krwar tousala?"

"Piten, fou mwan en lape. Mon pou toultan krwar mon mari toultan ki i ankor la. Li ki pe sonny mwan, li ki dan mon leker pa ou."

"Me tansyon en zour ou krwar mwan manman. Sanmenm tou ki reste pour mwan dir ou."

"Florans me mwan mon pa bezwen ou. Mon bezwen mon mari. Ki

annan pour mwan krwar ou? E si ou pa sorti la dan lakwizin kot mwan, ou a trouve kot mon pou bril ou ek en kwizyer lasos kari so. Reste lanmenm pa ale! Taler mon a donn ou en lokipasyon.”

Mon war manman kot i plonz son kwiye dan sa kastrol kari. Mon sorti dan lakwizin vitman. Mon latet in fini fermal. Pa zouzou ler ou pe koz laverite avek ou manman me i pa oule krwar ou. Yer i ti dir ki mon granzar, ozordi dan mon krwar mon pe ed li, i ganny lodas pour dir ki i pa bezwen mwan me i bezwen son mari. Me byen, si i bezwen son mari mon a gete ziska ki tan i pou bezwen. Petet sa lakord ki pe anmar zot ansanm pa pou zanmen kase kantmenm i annan sa pti fanm ki’n konmans pran kouto pour koup sa lakord. Sa fanm ki Misel in anbet manman an dizan i son ser. Mon pa pou kapab dir manman ankor naryen pangar i a bril mwan parey i’n dir. Mon a les li trankil. En zour ki apel en zour i pou konnen ki mon ti pe dir li keksoz ki vre. Sa zour i pou tonm azenou devan mwan e pou dir mwan ki prezan i bezwen mwan. La i pa oule krwar mwan, mon a ferm mon labous. En zour limenm li manman ki pou demann mwan pour reouver sa labous ki i’n fer mwan fermen, sa mon asire.

SAPIT 8

Misel pa ti la yer ler sa fanm ti vin dan lakour. Sa fanm ki Misel in anbet manman an dizan ki i son ser. Me yer manman ti konn laverite. I ti aprann ki sa ki mon ti dir li ti vre. I ti konnen ki i ti’n ganny anbete avek Misel me kantmenm sa i pa ti blanm Misel ditou. I pa ti fer okenn labriz.

Ti apremidi, apepre 2 er edmi ler sa fanm ti ariv dan lakour. I ti’n abiy dan en rob zonn avek en sapo fet dan latet. Manman ti anndan pe koud e mwan, mon ti pe asize parey i mon labitid anba en pti pye mang pe lir en liv. Premye kou mon pa ti’n war sa fanm akoz mon latet ti’n bese dan liv. I ti fer mwan sote ler i ti dir bonzour. Ler mon ti lev latet mon ti plito reste ebete pour war li. Deswit mon ti remarke ki ti limenm li sa fanm ki Misel ti anmenn dan lakour pandan labsans manman. Toudmenm mon ti reponn son bonzour. La i ti demann mwan si Misel i la me avan mon ti rann li larepons, manman ti’n fini ariv deor kot nou. La sa fanm ti obliye si i ti’n demann mwan en kestyon, i ti tourn ver manman.

“Madanm eskiz mwan si mon’n ariv isi devan ou laport, me mon byen bezwen ou mari avan i tro tar.”

“Mon mari? Me ki ou bezwen avek Misel san mon permisyon?”

“Pa foudre ou donn mwan permisyon, sa pa enportan e mon pa oule ou permisyon. Mon oule zis selman koz avek Misel. I byen serye.”

“Me akfer? Foudre mon konnen avan. Mwan ki son fanm e alors?”

“Byen madanm si vreman ou anvi konnen mon a fer ou konnen. Sa vant ki i’n donn mwan, dir mwan, lekel ki pou sonnyen.”

Mon pa ti’n remarke si sa fanm ti ansent. Ler i ti nonm vant, la mon ti trouve ki vre i pe atann en baba. Figir manman ti sanz kouler parey kanmeleon ler i ti tann sa parol.

I ti get mwan par kote e sa gete ki i ti get mwan, mon ti ganny sa mesaz ki i ti pe dir mwan.

‘Florans mon pa anvi koz avek sa fanm devan ou.’

Manman ti anmenn sa fanm anndan. Mon pa kapab dir mannier zot konversasyon ti deroule me sa ki mon ti trouve apre ti fer mwan konnen ki i ti'n mal pase. Mon ti per e mon ti bezwen kriy for avek manman pour li donn en lape. Manman ti sorti deor avek en kastrol delo so. I ti tay deryer sa fanm pour bouyant li. Ler mon ti kriy avek li, i ti larg sa kastrol ater e delo ti fannen partou dan lari. Sa gro lavaper ti monte e si i ti anvoy sa delo lo sa fanm sa ti pou'n fer li bokou dimal. I pa en fanm ki annan lapo blan, me sa delo ti pou'n donn li lapo blan. Mon ti debout e get manman. Mwan mon ti pe tranble avek lafreier e manman li i ti pe tranble avek laraz e i ti a riske tir son laraz lo mwan si mon ti bouz li. Alors mon pa ti dir li naryen.

Ler Misel ti retournen sorti travay mon ti krwar ki ti pour annan en gran diskisyon aköz konman i ti arive manman ti kriy li. Mwan mon pa ti anvi al mel mwan dan zot zafer. Mon ti anvi plito zis ekout zot koze. Mon ti remark ankor tre byen ki Misel ti ankor pe dir manman keksoz ki fo. I pa ti koz laverite. Ti annan en parol ki manman ti dir ki ti fer mwan war ki prezan i ti'n trouve ki mon ti vre lot zour. San kanmi i ti kriy mwan pour mwan repet devan Misel tou sa ki mon ti'n dir li. I ti'n obliye si i ti dir mwan ki i pa bezwen mwan. La, limenm ki ti anvi ki mon reouver sa labous ki i ti fer mwan fermen. Pour li santi tousala, mon ti bezwen dir li.

"Manman mon pa pou kapab repet ankor naryen sa ki mon ti dir ou lot zour, aköz mon per pangar mon a ganny en kwiye lasos kari so dan mon figir."

Ler mon ti fini dir sa, mon ti vir deswit e kit zot de tousel. Mon pa konnen konman manman ti santi li deryer e konman son figir ti vini. Zot pa ti fer okenn diskisyon pour en sel rezon. Sa rezon i aköz Misel ti ankor pe bat latet manman avek en gro miray e manman pa santi menm. Mon krwar fodre disan i koule pour li konnen ki i'n ganny bat latet me sa letan i pou'n tro tar aköz son latet pou'n fini pete. Si Misel ti admet laverite mon krwar ki ti pou annan en gran leokri kot nou yer swar.

Sepandan yer swar menm, apre sa pti lensidan, mon ti fer en rev dan

mon sonmey. I premye rev ki ler mon leve mon mazine depi ki mon papa in kit later. Mon pa tro mazine selman kimannier i ti konmanse, me sa ki mon rapel tre byen, ti annan en dimoun ki ti pe koz avek mwan. Sa dimoun ti menm konn mon non. I ti kriy mwan dan mon sonmey e koz avek mwan.

"Florans, mon oule ki ou ekout mwan tre byen. Mon pou koz byen kler avek ou pour ou nobou konpran mwan. Mon prefere koz avek ou dan ou sonmey konman en rev pandan ki tou keksoz i trankil. Florans, mon trouv tou ou bann problem ki ou pe rankontre kot sa lakour. Mon dan ou kote e mon pe touzour siport ou menm si mon konnen ou pa trouve. Me selman Florans, ou'n fer mwan plere lot zour ler sa laz ki ou annan ou ti al kot bonnonm dibwa. Ou'n konmans mazin siperstitisyon ki devan mwan i en tre gran pese. Mwan si ou ti priy mwan, si dan aswar avan ou ti dormi, ou ti fer en pe lapriyer mon ti pou akord ou sa ki ou ti pe rode. Mon konnen ou ti oule ed ou zanmi, sa mon kontan, me selman akfer ou'n ganny nide siperstitisyon kan mon ti la dan zot kote. Prezan mon'n montre ou en keksoz, mon'n montre ki mon pli for, mon annan plis pwisans ki sa bonnonm ki ou ti al kot li. Ou ti demann li pour fer papa Edwiz sanze, me mwan, par mon pouvwar ki mon annan, mon'n fer papa Edwiz pa sanze."

"Mon'n fer li okontrer vin pli feros e fer li separe avek son madanm ki zot ape viv dan lavi menaz ki i ankor en lot gran pese devan mwan. Mwan ki'n fer sa arive e mon'n anpes sa bonnonm fer son misyon. Par mon pouvwar, mon'n osi fer li pa kapab touy sa zonm ki ti vyol Edwiz. I'n seye, me i pa pli for ki mwan. Mon'n apel ou papa kot mwan dan en aksidan ki apepre parey sa demann ki ou ti demann ou bonnonm. Mon'n apel ou papa koumsa, aköz mon ti konnen ou ti pou panse ki kekfw ou papa ki ti vyol Edwiz. Me pa li ki'n fer sa, pa li ki'n vyol ou dalon, mon'n apel li koumsa pour mwan gete ki ou pou fer. Sa zonm ki'n vyol ou dalon mon konn li tre byen parey mon konn zot tou dan lemonn, e son pinisyon pe esper li kot mwan. Florans al met en pe fler lo latonm ou papa. Tou bann fler kot li in sek. Alors leve Florans al donn li fler e ..."

La mon ti sote dan sa rev. Mon ti ouver mon lizye an krwayan mon a war sa dimoun ki ti pe koz avek mwan dan bor mwan lo lili, me ti napa personn. Mon ti ankor mwan tousel lo lili. Mon ti sot ater e get anba lili si kekfw i ti'n kasyet mwan. Me ankor ti napa personn. Mon ti ouver lafnet petet i'n sot par lafnet. Lalin deor ti byen kler. Mon ti kapab war tou keksoz menm mon bann pli pti plan fler dan barik kot mon'n plant zot, mon ti nobou war zot. Me sa dimoun mon pa ti war li. Mon ti ferm lafnet e vin asize lo lili lanmen krwaze. Mon latet ti pe boulderse. Mon sonmey ti'n fini kase e kantmenm mon ti a fors mon lekor pour dormi, sonmey pa ti pou retourn ankor. I ti apepre enn er bomaten e mon ti reste asize lo lili ziska lizour i fer. Bomaten mon'n leve e mon'n prepar mwan. Kantmenm mon pa konnen lekel sa dimoun ki'n koz avek mwan, me mon krwar tou sa ki i'n dir mwan. Mon'n osi koup en pe fler e la mon pe esper bis pou al simityer Mon Fleri. Depi ler mon'n ariv la, de bis in pase e tou le de ti plen. Ozordi i lafen dimwan e fodre mon fer sir ki mon ganny en plas dan bis. En lot bis i vini vid, dimoun i koste pli pros avek semen mwan osi mon pa tarde, mon atrap mon sak plastik fler byen menm e mon fer mon semen anba lebra bann dernyen dimoun pou ganny en plas asize e sa ki vin apre mwan zot bezwen debout.

An arivan Mon Fleri, mon debarke e mon mars sa pti bout pour antre dan simityer. I annan de trwa madanm pe netway simityer. Ler mon ariv kot latonm mon papa, mon reste sezi pou war leta ki i ladan. Vre parey sa dimoun ti'n dir mwan yer swar, laplipar fler in sek. Bann ver in savir par kote. Zerb pe pouse lo latonm e pe detri bann lezot fler ki reste. Depi ki mon papa in mor, napa personn ou a krwar ki'n pas la ankor. Taler papa i a mazin en ki nou'n rezet li. Kekfw vre i annan ki'n rezet li, me mwan son sel piti ki i annan mon pa ankor rezet li e zanmen mon pou fer sa. Mon ava aranz son latonm e fer li byen zoli. Mon'n anmenn en bon pe kourpye pour plant lo latonm. Granmersi mon'n anmenn gro boutey delo avek mwan. Mon a ganny en pe pou lav bann ver avek e en pe mon a met dan ver e met fler ladan.

Mon konmans okipe avek mon travay e en demi er-d-tan apre, latonm in sanze. I'n zoli, i'n sile, i pa sa latonm ki mon ti war en demi er-d-tan avan. Bann fler ki mon'n fek mete pe konmans danse dan divan. Zot in ge zot osi e mon santi mwan fyer. Avan mon ale, mon fer en pti lapriyer lo latonm papa. Mon pa antren si sa bann madanm pe get mwan, mon lev mon rob enpe anler e mon tonm azenou devan latonm mon papa. Mon'n toultan tann dimoun dir ki ler ou pe tro mazin en dimoun ki lwen avek ou, oubyen en dimoun ki ou byen kontan, ou war li sa dimoun ki ou pe mazin en devan ou, ou war li dan ou vizyon e sa mon'n toultan war ki i vre. Plen fwa sa i arive avek mwan e la ozordi kot mon'n tonm azenou lo latonm papa e fer lapriyer, mon war papa dan mon vizyon, mon pe war li dan mon mazinasyon. I'n apiy avek son lakrwa ki lo son latonm e pe ekout mwan. Sa lalyans ki manman ti met dan son serkey, papa in met dan son prop ledwa. Mon ganny pour mwan plere e dek ki mon remarke ki sa bann madanm pe get mwan, mon eswi mon larm e mon sorti simityer.

Mon desann anvil pour aste enn de pti konmisyon. Mon bezwen rod en lot soulye aköz sa enn ki mon ti annan in konmans sere dan mon lipye. Dan premye laboutik ki mon antre, mon war sa fanm ki ti vin dan lakour yer. I pe aste en limonnad e konman mon war li, mon vir lanmenm pour sorti, me i'n fini war mwan li osi.

“Florans pa bezwen kasyet mwan. Mon annan en keksoz pour donn ou pour ou donn ou manman.”

Mon reste sezi ler i kriy mwan. Mon pa ti'n zanmen panse si i ti konn mon non. Sa pa lot ki Misel ki'n dir li mon non. Toudmenm mon debout e mon esper li. I oule donn mwan en let pou anmenn pour manman.

“Akfer sa let pour manman? Ou konnen, mon pa anvi pas konman zot zaviron milye mwan. Mon pa pou pran okenn let pour manman. I annan lapos al poste ou let.”

“Florans ekoute mon a eksplik ou. Sa let i napa ni zoure, ni maltrete, ni naryen mal ladan. Mon'n ekri li pour mwan demann li pardon pour tou sa bann keksoz ki ti pase yer. Mon'n reflesir ki mon annan tor e alors mon

anvi eskiz mwan. Pran sa let donn li. Mon lanmen ti pe ale pour pran sa let avek li, me en kestyon i vin dan mon latet e mon retir mon lanmen e demann li sa kestyon."

"Lekel ki'n dir ou mon ti pe desann anvil pour donn mwan let manman?"

"Bomaten mon'n desann dan menm bis avek ou. Ou, ou pa'n war mwan. Ou ti debark Mon Fleri avek en gro sak plastik fler e mon konnen ki ou bezwen desann anvil apre e alors mon'n degaze, mon'n ekri sa let kot enn mon bon zanmi isi menm anvil pour donn ou."

"Bon, donn mwan mon a anmennen pour li. Me tansyon mwan apre si ou let i lekotrè ki sa ki ou'n dir mwan i annan ladan."

"Non, mon ser, ase per."

Mon pran sa let avek li e mon kit li. Konman mon ariv dan lakour apremidi, mon donn manman son let. Avan i pran, i demann mwan kote let i sorti. Pour fer li pran sa let vitman, mon anbet li. Mon pa dir li ki let i sorti kot sa fanm, mon dir li i sorti kot tantin Pti Fiy. Ler mon nonm li sa non, deswit i pran let dan mon lanmen. Mon kit li pe dekastè let e mon antre dan mon lasanm. Plitar dan mon pe admir sa zoli soulye ki mon'n fek aste, mon tann li kriy mwan avek en laraz.

"Florans vin isi kot mwan: gran piten, move piti."

Sa kriye mon'n fini konnen ki'n arive. I pa drol pour mwan akòz mon ti konnen ki i ti pou kriy mwan ler i pou al dekouver ki let pa sorti kot mon'n dir li i sorti. Mon pa per naryen, mon konnen dan sa let i napa ni zoure, ni maltrete. Mon sorti e mon vin kot li. Sa fanm i debout lanmen dan leren. Sa let in pran, in larg ater. Zafer pa bon mon konnen. Sa lekspresyon ki lo son figir i dir mwan ki sa let pa'n fer li kontan. Mon konmans per. Mon de lazanm i konmans tranble ler mon marse. Toudmenm mon vini e mon debout devan li.

"La mwan manman."

"Piten kote sa let i sorti? Pa ou ti dir mwan i sorti kot Pti Fiy."

"Me manman mon'n ..."

Mon pa ankò fini koze me li i'n fini fer de son bann gro kalot rezonnen dan mon figir. I pe al anvoy son trwazyenm, me mon say akote. Douler sa de gro kalot i marse dan mon figir. I annan laraz sepandan dan mon leker. Depi ler mon lo later, zanmen mon'n deza ganny lanvi rann manman son bann kalot ler i kalot mwan. Ozordi i pa leka. I ti a'n les mwan fini koze avan i ti tap mwan. I napa en rezon pour tap mwan. Mon pa realiz naryen. Mon zis obliye si mon manman. Mon lev mon lanmen mwan osi e mon rann li en kalot dan son figir, menm landrwa kot i'n tap mwan.

Deswit mon ale pour mwan taye me i tyonbo mwan. I met mwan apiye dan en kwen e mon konmans ganny ansonmen. Ennler mon krwar i pe touy mwan. Kantmenm mon kriy ase, kantmenm mon kriy ayoyo, kantmenm mon demann li pardon, manman pa antren. Konmsi ler mon'n tap li sa kalot, mon'n rod lagal kan mon napa zong pour grate. Me i pa fini la, ler i larg mwan mon ganny kouraz pour fou li ankò en kou-d-pye e sa voyaz mon fer sir ki i pa ganny mwan. I tyonbo en po fler e i anvoy avek mwan, mon koule e po fler i kraze anndan. Mon sorti deor e la i konmans ensilte mwan. I zour mwan avek mon manman kantmenm limenm li mon manman. I dir mwan si mon antre dan son lakaz i pou touy mwan. I pa pou pran okenn pitye. Mon pa reponn sa fanm, mon les li dispit. Mon al asiz lwen pour mwan pa tann sa ki i dir.

Lanmen anba lanmaswar mon remazin tou sa ki'n pase depi yer ziska ozordi. Kantmenm manman ti'n ansonm mwan, mon pa ti ankò plere. La prezan ki mon larm i koule. Mon konmans regrete mon'n tap li, me i'n arive akòz selman mon pa'n kapab kontrol mon lakoler. Akfer ki i ti tap mwan sa de premye kalot? Mon dakor mon'n anbet li en pe, me mon'n fer sa pour li pran sa let san demann mwan plis kestyon. Mon konnen ki si mon ti pou dir li let i sorti kot sa fanm, avan i ti pou pran, i ti pou demann mwan en bann kestyon e sa bann kestyon mon pa ti pou kapab reponn. Mon konmans pa tro krwar ki i'n tap mwan akòz mon'n anbet li.

Mon konmans mazine ki petet sa let i pa parey sa fanm in dir mwan i ete. Petet okontrer, i'n zour manman, petet i'n maltret manman pli ba ki later. Petet i'n anbet mwan par dir mwan ki sa i en bon let pour mwan kapab pran son let e anmennen. Mon plis ki sir ki sanmenm sa ki'n arive.

La prezan problemm i lo mwan. Mon pa pou kapab apros manman e demann li pardon. I pa pou aksepte sa pardon e i pou ansonm mwan plis ankor. Petet vre i a touy mwan parey i'n dir.

Mon krwar ki prezan mon'n vin sa zaviron milye ki mon ti dir sa fanm bomaten mon pa anvi vini. Depi de trwa zour sa lide bwar pwazon ti'n sorti dan mon latet. Ozordi mon pe remazin li ankor. Mon pa konnen ki mon pou fer avek mon lavi. Si vre ti annan pwazon avek mwan la ozordi mon ti pou bwar. Me malerezman, mon napa sa pwazon. Mon lavi alors i avan kontinyen dan sa problemm.

Ler Misel i retournen sorti travay, mon ankor lanmenm lanmen anba lamaswar. Sa letan mon larm ki'n koule depi ler mon la, si mon ti'n met en seo anpare, mon krwar i ti a'n bezwen plen a sa moman.

"Florans ki ou pe fer la? Konmsi ou tris, ou dan lapenn. Ki ou gannyen?"

"Naryen. Mon zis granzar."

Misel i al deswit san dir mwan naryen ankor. Mon konnen ki i pa'n kontan sa parol ki mon'n dir, me pa fer mwan naryen. Mon pa bezwen li pour pran mon zentere. En lot lide sepandan i pas avek mwan. Mon konnen mon pa pou kapab antre dan lakaz ozordi. Mon konnen manman sa move limer ki i ladan, mon konnen i a kapab fer sa ki i'n dir mwan i pou fer e si i a regrete, i a regret plitar. Mon'n ganny en sel lide. Mon a desann anba kot Madanm Lanklim e mon a demann li pret telefonn e mon a telefonn Ton Feliks e mon a fer li vin sers mwan. Mon ava al dormi kot li. Mon sot ater kot mon pe asize lo ros e mon desann kot Madanm Lanklim.

Madanm Lanklim i enn nou bann vwazen ki pli byen avek nou. Toultan i ed nou ler nou dan difikilte. Zanmen i a refiz ou en servis, i a fer

son mye posib pour ede. I pa pou demann ou naryen an rekonpans. Si ou pou donn li larzan, i pou refize pran. I a toultan dir ou ki son rekonpans i anler kot Bondye.

Deswit konman mon dir ki mon'n vin fer, i pa demann mwan okenn kestyon. I pret mwan telefonn avek son bon leker. Mon fer limero, telefonn i sonnen kot Ton Feliks me personn pa reponn.

Ou a dir mwan ki napa personn laba? Kot zot i'n kapab ale zot tou? Mon debout mon espere menm. Personn pa reponn menm. Zot bezwen pa la. Mon'n vin avek en move sans. Ki mon pou fer la prezan? I pa zoli pour mwan dir avek Madanm Lanklim ki mon'n vin rod en pti landrwa dormi kot li. Mon konnen i pou dakor, me selman mon pou bezwen dir li tou sa ki'n pase. I pou bezwen demann mwan pou dir li tou sa ki'n pase. I pou bezwen demann mwan kestyon e mon pa pou kapab pa reponn li. Me les li. Sis er edmi pe sonnen, mon ava esey koz avek li.

"Madanm Lanklim, mon dan en gro problemm e mon konnen ki zis ou ki kapab ed mwan ler ki'n arive."

"Depi ler ou'n vin kot mwan e demann mwan pret telefonn, mon'n remarke ki konmsi ou dan en problemm. Me ale dir mwan ki ou problemm."

"Avan mon dir ou mon problemm, mon a demann ou si ou pou kapab les mwan dormi kot ou ozordi swar."

"Me Florans aköz, zot in ganny zafer zot de ou manman?"

"Dir mwan si mon pou kapab dormi kot ou avan. Apre tanto, mon a eksplik ou sa ki'n arive."

"Me si ou met mwan dan problemm Florans ler mon pou les ou dormi kot mwan?"

"Non, mon pa pou met ou dan problemm, zis ed mwan."

"Mon a les ou dormi kot mwan ozordi swar avek en kondisyon ki tanto ou a dir mwan sa ki'n arive. Apre si mon kapab ed ou, mon a ed ou."

"Wi, Madanm Lanklim mon promet ou."

Pandan ki nou pe dinen mon rakont Madanm Lanklim tou sa ki'n

arrive. Konmsi mon pe rakont li en zistwar ki ti'n fini ekri dan mon latet e la prezan zis mon pe lir avek li. I ekout mwan byen atantivman ziska ler mon fini dir sa ki mon ti annan pour dir.

"Florans, mon'n konpran ki'n arrive. Me dir mwan aköz ki ou ti rann Titin. Ou a ganny lanmen mor ou konnen."

"Mwan menm mon pa konnen aköz ki mon ti tap li. Mon krwar mon pa'n kapab kontrol mon lakoler."

"Ler ou ti tap li sa kalot e apre i ti ansonm ou parey ou'n dir, ou pa ti ava tap li kou-d-pye ankör. I ti a'n fini avek ou."

"Mon'n realiz tousala Madanm Lanklim. E la kantmenm mon pou dir li pardonn mwan, i pa pou oule."

"Zisteman Florans fodre ou demann li pardon. Sa ki dir ou ki i pa pou oule."

"Mon konnen i pa pou oule aköz i'n dir mwan si mon antre dan lakaz i pou touy mwan san pran okenn pitye."

"Florans ase bet. Titin i kapab touy ou. I'n dir ou sa pou fer ou konnen ki i'n ankoler. Lekel sa manman ki pou touy son piti."

"I pou touy mwan. I ti serye ler i ti dir sa."

"Florans, demen bomaten mon a mont avek ou kot Titin e mon a demann li pardon dan ou plas. Ou a trouve si i a touy ou."

"Mersi Madanm Lanklim. Mon a kontan ou a mont avek mwan kot li."

SAPIT 9

Lannmen bomaten Madanm Lanklin i mont avek mwan kot manman. An arivan dan lakour i fer mwan antre avan e li i maske deryer pour li war ki manman pou fer. Premye kou, mon pa oule tro fer parey i dir mwan fer, me apre mon aksepte. I maske deryer sa ros ki mon ti lo la yer apre ki mon ti'n tap manman e mon vin dan lari. Konman manman i war mwan i konmans dispit ankör.

"Vini move piti, antre ou a trouve ki mon a fer ou ozordi? Mon pou touy ou mon'n dir ou. Mon pa reponn li, okontrer mon vir deryer pour gete si Madanm Lanklim i ankör pe kasyet. Me, non i'n sorti. I pe vin kot lakour prezan. Manman i reste sezi ler i war Madanm Lanklim antre anndan dan lakaz. Mwan mon reste deor."

"Titin ki'n arrive avek zot de Florans?"

"Florans? Mon pou touy li. I pa pe antre dan mon lakaz."

"Me Titin ekoute. Ou pou napa regre pou touy ou prop piti?"

"Mon piti? Si i ti mon piti i pa ti a lev son lanmen ek son lipye pour tap mwan avek."

"Mon dakör Titin, me pardonn li."

"Madanm Lanklim les mwan dir ou ki si mon pardonn sa piten konmsi mon pe fer en gro pese. I pa'n zis tap mwan, yer i'n osi anmenn en let ranpli ek zoure pour mwan sorti kot en nespes fanm e ler i a donn mwan let, i a dir ki let i sorti kot Pti Fiy."

"Ti annan zoure dan sa let Titin?"

"I kapab non, i annan zoure dan sa let ki zanmen ou'n deza konnen."

"Oli sa let?"

"Mon'n brile depi yer."

"Titin mon konpran tousala, me pardonn li. I pa ti konnen si dan sa let ti annan zoure."

“Madanm Lanklim si i pa ti konnen ki dan sa let ti annan zoure, akòz i ti dir mwan ki let i sorti kot Pti Fiy?”

Konman manman i demann sa kestyon, Madanm Lanklim i tir likou deor e get mwan. Mon konnen ki i anvi ki mon reponn sa kestyon, alors mon pa per pour koze, parol osi i vin volonter dan mon labous.

“Manman yer avan ou ti tap mwan sa de kalot, mon ti ape al eksplik ou ki’n arive. Ou pa ti les mwan fini koze. Ou konnen, mon ti zwenn sa fanm anvil dan en laboutik. Ler mon ti war li, mon ti sorti deswit dan laboutik avek lide pour li pa war mwan, me i ti’n fini war mwan. I ti fer mwan esper li. Mon pa ti oule pran sa let premye kou, me i ti dir mwan ki napa ni zoure ni naryen mal ladan. I’n zis ekri ou pour demann ou pardon akòz i war ki li ki annan tor, i ti dir mwan. Alors mon ti pran sa let. Ler mon ti pe donn ou sa let ou ti demann mwan kot i sorti. Mon pa ti dir ou ki i sorti kot sa fanm pour ou pa demann mwan okenn kestyon akòz mon ti pou napa repons pour rann ou. Alors mon ti dir ou ki i sorti kot tantin Pti fiy pour ou pran sa let san demann mwan plis kestyon. Prezan manman mon vin demann ou pardon. Kekfwa mwan ki annan tor. Mon ti tap ou akòz mon pa ti kapab kontrol mon lakoler. Pardonn mwan manman mon promet ou ki mon pa pou fer ankor.”

“Mon pa pe pardonn ou. Ou konn tre byen ki ou’n fer. Ou ki pe soutir sa fanm.”

“Titin pa koz sa fason avek li. Ou fer li per. En manman i devret pardonn son piti dan en sityasyon parey.”

“Madanm Lanklim mon pa pou zanmen pardonn Florans. Parey mon’n deza dir li e la mon repet devan ou, mon pa bezwen li.”

“Me akfer ki ou fer piti apre ki ou pa pou bezwen?”

“Si i pa ti granzar, mon ti ava bezwen li. Depi ki son papa in mor, Florans in sanze. I’n ganny li en move mantalite konmsi dimoun ki’n touy son papa. Mon pa pou bat li, me selman mon pa pou pardonn li.”

“Me kimannyer ki ou pa pou bat li e anmenmtan ou pa pou pardonn li?”

“Plitar ou a konnen akòz mon dir sa. Mon konn dres move piti mwan.”

Ler Madanm Lanklim i retourn kot li, mwan deryer mon reste nek tranble. Manman pa koz avek mwan ditou me i get mwan gro lizye. Ler mon pas obor li, deswit i al krase. Konmsi mon pe donn li maloker. Mon santi mwan vreman malere. I’n met mwan anba son talon lipye e i pe kraz mwan. Byento mon a vin satini, me mon a bezwen soumet. Aswar Misel i vini, i anmenn de sopin limonnad. Enn pour mwan e enn pour Mervin. Me ler i ofer mwan pour mwan, manman i vini i aras mwan.

“Misel pa ou ki pou sonny granzar.”

Mon pa anvi war manman dan mon lizye, e alors mon al asize trankilman dan mon lasanm. Plitar zot al get televizyon kot enn nou vwazen. Mon reste mwan tousel dan lakaz. Mon profite pandan sa moman pour fouy enpe partou pour mwan gete si mon pa bat avek naryen ki a kapab servi mwan pour fini avek lavi. I napa en sans pour mwan kontinyen viv. Ler ou napa en papa, e ou manman pa kontan ou, akfer ki ou pe viv? Plito lanmor i pran ou, me lanmor dan en sityasyon parey zanmen i pou vini. Toultan i a pran en dimoun ki pa ti ankor ler pour mor. La i’n ler pour li pran mwan, me mon pa war li vini. Me mwan mon’n determinen. Mon pou al rod li kot i ete. Mon pou fors li pran mwan.

Konman mon pe al antre dan lasanm manman pour mwan gete si mon pa war naryen, mon tann ouver laport. Mon degaze, mon antre dan mon prop lasanm e mon fer konmsi mon pe dormi. Misel i antre kot mwan.

“Florans mon’n monte mon’n kit ou manman anba. Mon pa kapab siport tou sa ki i pe dir. Nek i pe mal koz ou.”

“Donn li lanmen ou osi mal koz mwan. Ale dir ou osi ki mon granzar.”

“Florans, mwan zanmen mon pou fer sa. Mon pa koz en dimoun ler i pa la.”

“Prezan ki ou vin fer isi kot mwan?”

“Mon vin dir ou sa.”

“Me eskize mon pa oule tande. Les mwan dormi. Mal koz mwan mannyer zot oule. Pa fer naryen. Sorti les mwan repoze.”

Misel i sorti i ale. Mon tann li ouver en sopin. Mon konnen ki son bi pour li vin kot mwan, me i pa pou ganny mwan koumsa. Fodre anmwen i a rod en tiktak ki mon pa pou konpran. Tou sa bann leson limenm ki’n donn mwan.

Lannmen mon leve e premye keksoz ki mon fer ler mon fini pran mon ben, mon al sof en pe manze ki’n reste yer swar e mon manze. Dernyen manze mon ti manz yer bomaten kot Madanm Lanklim. Dan lakour yer, kantmenm manze ti’n pare, mon pa ti ganny lapeti pour manze. La en lafeñ in pran mwan. Lever pe konmans mal koz mwan dan mon vant parey ki manman pe mal koz mwan. Zot sa bann lever zot mal koze i pli fermal ki mal koze manman e alors mon bezwen lalit kont zot avan. Mon manz en bon lasyet manze sofe e plitar i menm reste plas dan mon vant pour mon gadyak.

Manman li, ozordi i pe al anvil. Yer Misel in ganny peye e konman ozordi Sanmdi, manman pe al aste konmisyon le mwan.

Sa bann dernyen lafen dimwan pase, mon’n toultan al avek li pour rod sa bann konmisyon e apre nou pran en taksi e nou retournen. Ozordi mon konnen i pa pour oule mars avek mwan. I prefere okontrer ozordi anmenn Mervin avek li. Petet i panse sa i a fer mwan zalou, me i tronpe. Mwan osi mon pa anvi mars avek li e de plis mon konn anvil.

Mon konmans netway lakaz deswit konman i sot deor zot de Mervin pour ale. Menm si mon napa sa vre kouraz pour fer okenn louvraz, mon bezwen fer. Mon ava tir zot dan salte kantmenm zot koze ki zot pa bezwen mwan. Pandan ki mon pe met lord dan komod manman mon lanmen i al atrap en papye pilil.

Ladan i annan en bann gro pilil kouler en pe oranz. Mon riye ler mon get sa bann pilil ziska ler mon bave. Mon’n reisi ganny sa ki mon ti pe rode. Mon

ploy sa papye pilil e mon met dan mon souksen byen menm. Plitar i a servi mwan. Zis konman mon fini met sa papye pilil dan mon souksen, Misel i antre kot mwan. Mon degaze e fer konmsi mon pe okipe menm dan komod.

“Ou pa ankor fini netway lakaz, mon ser?”

“Gete, mon letan i pour mwan. Mon pa pe tay avek okenn louvraz.”

“Florans konmela tou kou ler mon koz byen avek ou, ou mal reponn mwan. Akoz sanmenm sa ki mon ti dir ou lot zour ki ou granzar.”

“Me wi, mon granzar menm mwan. Tou dimoun ki granzar pa konn koz avek son kanmarad.”

“La ou manman in fini avek ou. Si ou ti oule fer parey mon dir ou fer, ou ti ava otreman ozordi.”

“Kwa ki ou’n dir mwan fer?”

“Pa zwe bliye Florans, ou pa rapel ler mon ti dir ou ki mon pe esper ou?”

“Esper mwan ou. Ou a espere ziska ler ou a fatige. Pa sa Florans Morel ki ou pou gannnen.”

“Florans konsantre, nou pou ere nou de. Mon ava fer fer en lakaz dan lavil pour nou. Titin i a demerd li. Mon pa oule li ankor en fwa mon dir ou.”

“Ou lakaz ler ou a fer ou a ganny sa fanm ki ou ti vin avek dan lakour, pour vin reste avek ou si vreman ou pa anvi manman. Pa mwan ki ou a gannnen. Mon sorti kot li osi konman mon fini dir li sa. Mon pa fini netway zot lasanm, i ava reste koumsanmen. Si manman i rode akoz mon pa’n fini netwaye mon pa pou per pour dir li aköz. Apremidi konman manman i retournen vre premye keksoz ki i al remarke, i son lasanm ki pa’n fini ganny netwaye. Mon pe lave deryer lakaz i fer mwan kit sa bann lenz e vin kot li.”

“Florans dir mwan, ki ou oule mon fer avek ou? Tou le zour ou kapab fer mwan pran lakoler.”

“Manman ou lasanm mon ti ape netwaye parey ou war mon’n konmanse, si pa ti aköz Ton Misel, mon ti a’n fini netwaye.”

“Misel ki’n fer ou pa netway mon lasanm? Kisa, tou kou ou leskiz i lo mon mari?”

“Manman ou kapab pa krwar mwan si ou oule. Mon ti pe netwaye e li i vin kot mwan e vin fatig mwan. I pe dir mwan ki i pe esper mwan fini lekol pour li fer en lakaz anvil pour mwan al reste avek li. I dir mwan ki i pa oule ou, me i senpleman anvil mwan.”

“Florans ou, lontan ou anvil fer mwan kite avek Misel. Lekel ki pou krwar ki Misel i kapab dir ou en keksoz parey.”

“Pa krwar mwan si ou pa oule. Mon konnen mon pe koz laverite. Manman i ale i al lev Misel ki ape dormi. Misel i leve e i repet sa ki mon’n dir li devan Misel. Sa bebet i zwe inosan, i ganny pour li demanti mwan e manman i tonm ankore dan son pyez.”

“Titin, Florans i kapab dir ou en keksoz koumsa. Florans pa i en piti dezagreman sa. Ki ras kreatir sa.”

“Misel, la zwe ou pa’n dir mwan naryen. Mon kapab dir plis ankore tou bann keksoz ki’n pase e ki manman pa konnen.”

“Titin les li dir ou. Les li koz son bann lalang, son pese li ki pou zize, pa ni mwan, ni ou, ni menm Mervin.”

Mon pa kanmi naryen, mon dir manman tou keksoz ki’n pase. Mon pa kit enn akote, mon menm dir li ler mon ti’n ansent e konman Misel ti donn mwan lekors pour bwar e touy piti.

Me manman olye ekoute, i redi mwan avek li, i delarg son sang dan son lekren e i fer koze lo mwan. Misel osi i vini, i ansonm mwan kalot e i menm tap mwan kou-d-pye dan deryer. Mon les zot fer mannyer zot oule avek mwan. Mon konnen Bondye i war tousala. Mwan mon zis tyonbo byen mon lenz bor kot mon tete. Sa bout la mon tyonbo byen sere.

Ler zot larg mwan, latras sang in marke lo mwan, partou dan mon figir. Mon pe osi soufer sa bann gro kou-d-pye Misel. Sa voyaz mon pa ganny lanvi pour rann person. Mon les zot antre dan zot lasanm e apre mwan, mon deswit ranpli en gro ver delo e mon anmenn avek mwan dan mon lasanm. Mon ferm laport byen dousman e mon osi tak li. Mon asize

lo mon lili e mon tir sa papye pilil dan mon souksen. Mon demann Bondye pardon avan, akòz mon konnen i en tre gran pese ki mon pe al fer, me mon pou bezwen fer li. I mon sel solisyon. Apre sa pardon ki mon’n demande mon anval kat sa bann pilil. Mon poz en kou. Apre apepre karant segonn, mon anval sis ankore e larestan mon met anba mon zorye. Si i pa fer mwan naryen, mon ava anval tou.

Mon la lo lili. Premye kou mon konmans tranble. Mon pa war en pozisyon ki bon pour mwan lo lili. Mon lekor antye i konmans redi e mon lizye pe vin pli nwar. Mon konnen sa bann pilil pe fer zot louvraz ki mon anvil zot fer. Mon kontinyen redi e mon roule ziska ler mon pas an pasan e mon tonm ater. Mon esey soulaz mwan, me mon pa kapab leve